

APOSTOL REMBIAPO LOS HECHOS

Tũpa omboura Espiritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer. ² Ocuerayevire, ivave oso renondeve, Jesús omombehu oporocuaíta Espiritu Santo pĩratasa pipe güembiporavo apóstol upe sembiaporã. ³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tũpa mborerecuasa resendar güemimbohe upe.

⁴⁻⁵ Oicove vitesse yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tũpa güemimombehu, ahe acoi amombehu pēu. Juan niha pe āpiramo i pipe tēi; Tũpa rumo Espiritu Santo pipe pe āpiramora. Movĩromi tēi ari ipane vite imondo āgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cĩritei Israel iguar upe pĩratasa iyeyecuai āgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua āgua pēu. Esepia, Tũpa año ité vireco omborerecuasa ahe mbahe apo āgua.

⁸ Peipisira rumo Tūpa pīratasa oiquese Espiritu Santo pe piha pipe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tūpa viraso ivave. Ichui Jesús oi que iva quiha pāhuve. Evocoyase ndosepia iri eté yuvireco cute. ¹⁰ Omahe viteseve yuvinoha ivave ichosa rese, aviyeteramo tēi ñuvirío mbia, ituru-cuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tūpa viraso ivave pe sui, ēgüe ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyeví yuviraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemi imombehusa judío guata ãgua mbituhusa arí pipe yepi. ¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu arí yacatu rupi oñemonuha oyoya guasu oyeroquí ãgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepeí arí pipe oñemonuha guasu ciento veinte ava yuvireco. Ipāhuve Pedro opūha

aipo ehi ava upe: ¹⁶ “Che mu eta Jesucristo reroy-
asar, iya ité co imboaviyesa Tūpa Ñehengagüer Ju-
das recocuer resendar. Ahe imombehupri David
upe Espíritu Santo pipe aracahe. Evocoi Judas
viraso vahe Jesús amotarēhimbar ipisi uca āgua.
¹⁷ Ahe acoi secoi yande pāhuve co mboraviquisa
rese yande pītiviī āgua avei viña. ¹⁸ Evocoi
güembiapo ai repri pipe omboepi ivi. Ipare ñaca
iviso oviapi oso ivive, oyetiapiipa. ¹⁹ Opacatu ava
Jerusalén pendar oicua Judas recocuer yuvireco.
Sese co ivi upe, ‘Acéldama’ ehi yuvireco oñehe pipe
‘Ivi Tuvi resendar’ oyapave. ²⁰ Esepia, icuachiapri
Salmo pipe aipo ehi:

‘Taseyasa sēta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rāgüer pisi
āgua’ ehi vahe.

²¹ “Evocoyase cohava oime ava yande Yar
Jesús secoi vitese yande pāhuve ²² ñapiramosa suive
yuvirecoiño vahe ité yande rupi iyavei ivave
ichosa osepia vahe avei yuvireco. Ahe tiporavosa
ñepeī ipāhu pendar yande rupi icuerayevi agüer
mombehu āgua” ehi omboetasa upe.

²³ Evocoyase oiporavo ñuvirío mbia yuvireco:
ahe José Barsabás, serosa Justo; ambuae rer
Matías. ²⁴ Ipare oyeriqui yuvireco aipo ehi: “Nde,
ore Yar, opacatu ava piha ereicua. Emboyecua
cohava nde rembiporavo oreu; ¿uma vo ereipota
²⁵ eremondo vaherã icuaitarã apóstol seco āgua
Judas recuñara? Ahe oangaipa pipe oyemocañi
uca tēi vahe oico” ehi Tūpa upe yuvireco.

²⁶ Evocoiyase osãha iporavo yuvireco. Matías ité vinose iporavopri sui yuvireco. Ichui tupri ité oique once apóstol pãhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oi guasu pïpe yuvireco.

² Aheve oi pïpe aviyeteramo tēi ivitu ipĩrata vahe nungar siapu guasu ou iva sui. Ahe siapugüer oyendupa tupri oi pïpe.

³ Ahese oyecua tata rendigüer nungar opacatu aheve yuvirecoi vahe harive. ⁴ Ahese avei Tũpa omoingue evocoi ava pĩha pïpe oEspíritu Santo. Ichui ahe Espiritu omoñehe uca ambuae ñehesa pïpe yuvireco.

⁵ Ahe ari pïpe setá iteanga judío yuvirecoi Jerusalén ve omboaviye vahe ocuaita Tũpa mboeteisa, ahe oñemonuha vahe opacatu ivi rupindar yuvireco. ⁶ Mbahe siapu guasu vahe renduse, oñemonuha ati tēi yuvireco oyese. Ndoymboaracuai tēi yuvireco ambuae ava oñehe pïpe ñehese. ⁷ “¡Too!” ehi tēi oyepĩhamondĩisa pïpe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ ¿Mahera pĩha co ñepei-pei oñehe yande ñehe pïpe yuvireco? —ehi tēi oyeupe yuvireco —.

⁹ Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma

pendar, ¹¹ judío yuvirecoi vahe, ambuae judío aracuasa seroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tũpa rembiapo icatupri vahe! —ehi.

¹² Opacatu oyepihamondi, ndoicuai opihañemoñeta ãgua yuvireco.

—¿Mara ehi pĩha co na oya yuvireco? —ehi-ehi tẽi yuvireco oyeupe.

¹³ Ambuae ava rumo seroĩrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoyase Pedro opũha opacatu once vahe apóstol pãhuve, oñehe pĩrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheerã pẽu; peyapisaca tupri che ñehe rese: ¹⁵ ndosavaipoi moco co mbia yuvireco. ¿Ndapesepiai vo añihivei vite cũritei? ¹⁶ Co niha Tũpa ñehe mombehusar Joel oicuachía vahe aracahe:

¹⁷ Tũpa aipo ehi:

Coiye, ari cañi renonde, amondora che Espiritu Santo opacatu ava upe.

Ipĩratasa pipe pe rahir, pe rayri oñehera yuvireco.

Mbia chĩhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

¹⁸ Supi eté ahe ari pipe amondora che Espiritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipĩratasa pipe.

- 19 Amboyecuara poromondiisa iva rese.
 Ëgüe ahe aveira poromondiisa mboyecua ivi pipe:
 tuvi, tata iyavei tâtachi.
- 20 Yande Yar arî tuvichá vahe imboeteipri renonde
 ohara pîtu, yasi oyeapora tuvi nungar.
- 21 Opacatu ava, che Yar che pîtivîi eve, ehi vahe,
 ahe oñepisirora yuvireco' ehi Joel icuachía
 aracahe.
- 22 “Pe Israel suindar, pesendu che ñehe: Jesús,
 Nazaret pendar, oyapo poromondiisa tuvichá
 vahe, mbahe yavai vahe Tũpa pĩratasa pipe pe
 pãhuve güeco maranehi mboyecua ãgua. Ahe niha
 peicua opacatu. 23 Ipare rumo evocoi Jesús imon-
 dosa pẽu yuca ãgua. Ahe rumo Tũpa remimbotar
 rupi. Esepia, yipive ité Tũpa oicua pe peipisira
 yuca uca ãgua curusu rese ava naporai vahe upe.
- 24 Tũpa rumo ombogüerayevi manosa sui. Esepia,
 manosa ndoicatuî sereco ãgua. 25 Supi eté mbor-
 erecuar guasu David oñehe Jesús recocuer rese
 aracahe aipo ehi:
 ‘Che aicua che Yar che rese secoi che acato coti
 mbahe tẽi pipe che viapiẽhi ãgua yepi.
- 26 Sese avihaño ité vichico, asapucai avei che
 rorivetesa pipe.
 Iyavei che yeroya tuprisave asãrora mbahe aviye
 vahe che recove iri ãgua.
- 27 Esepia, nde ndereseyai chira che hã omano
 vahe pãhuve, nderemonduyu ucai chiaveira
 nde rembiguai seco maranehi vahe rete-
 cuer.
- 28 Co tecovesa ereicua uca cheu.
 Che mbovihara eve nde rese che recose' ehi David
 aracahe.

29 “Che mu eta, supi eté yande ramoi David omano, ñotisa ita hopri pipe aracahe. Ahe suvîpa ouve vite cohava yande pâhuve. 30 David rumo Tûpa ñehe mombehusar, oicua Tûpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe. 31 Ahe ndoyaviî osepiya vahe ité Poropîsirosar cuerayevîsa. Evocoyase aipo ehi oñehe sese: ‘Ihã ndopitai chira omano vahe pâhuve iyavei setecuer ndituyui chira’ ehi aracahe. 32 Evocoi Jesús, Tûpa remimbogüerayevi secoi. Ahe imombehusar opacatu ore oroico. 33 Ipare Tûpa viraso oacato coti imboguapi. Ahe oipîsi imombehupri Espîritu Santo Vu sui. Evocoyase ahe opa omondo co ava yuvîrecoi vahe upe. Ahe pesepîa, pesendu avei cûritei peico. 34 Esepîa, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohava che acato coti che pîri.

35 Asecopîpa uca ranera nde amotarêhimbar ndeu, ehi Yar che Yar upe’ ehi David aracahe.

36 “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatîca vahecuer, ahe Tûpa omoingo opacatu yande Yarã iyavei yande pîsiro âgua” ehi Pedro ava rehî upe.

37 Aipo renduse, tasí iteanga ipîha pipe yuvîreco. Evocoyase oporandu chupe, ambuae imboetasa upe avei yuvîreco:

—Ore mu, ¿mbahe vo oroyapora evocoyase? — ehi.

³⁸ Evocoyase aipo ehi ahe ava upe:

—Pemboasi pe angaipa; peyevi Tũpa upe. Iyavei peñeapiramo opacatu Jesucristo rer pipe. Evocoyase Tũpa iñerora pe angaipa rese. Iyavei omondora Espĩritu Santo pẽu. ³⁹ Esepia, co ñehesa imombehupri, ahe pẽu nara, pe suindar upe nara iyavei opacatu amombri Tũpa sui yuvirecoi vahe upe nara avei, ahe acoi opacatu yande Yar Tũpa oyeupe nara gũeru pota vahe —ehi.

⁴⁰ Ëgũe ehi oñhe vite ava mboaracua aipo ehi:

—¡Peyepipi co ava secocuer co coti tẽi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ite apóstol porombohesa. Opacatu guasu avei oyeaisu tupri yuvireco, oyeroci iyavei oñemonuha oyeupe pan mboyaho-yaho ãgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tũpa suindar yande porombohesa yuvireco’ oyapave. ⁴⁴ Opacatu Jesús reroyasar ipihañemoñeta tupri ite ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tũparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyembovihasa pipe, opihañemoñeta

¹⁰ Omahecuase sese, “¡Too!” ehi tēi yuvireco. Iyavei ndoyembovhai aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñhe ava rehi upe tūparo Corero Salomón serer vahevrive

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise.

¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndojavii co ore pĩratasa pipe tēi iyavei Tūpa rese ore pihañemoñeta tupriisa pipe tēi orombogüera vahe co mbia pēu viña. ¹³ Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pĩratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoiyase ndapeipotaiño imose ãgua chupe.

¹⁴ Ahe seco maranehi vahe, seco ñvi vahe renose rãgüer pipe, peporandu: ‘Tosē oporapichi vahe’ peye. ¹⁵ Ëgüe peye acoi tecovesa ombou vahe yuca. Tūpa rumo ombogüerayevi omano vahe pãhu sui. Ahe niha ore oromombehu oroico pēu. ¹⁶ Co Jesús rer rese yeroya pipe ité niha oipisi pĩratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

17 “Che mu eta, che aicua acoi pe peipĩtivii vahe pe rerecuar Jesús yuca uca ãgua pe icua tupriẽhi pipe cuese. 18 Ëgũe ehi Tũpa imboaviye aracahendar opacatu oñehe mombehusar upe gũemimombehugũer: ‘Che Rembiporavo Poropĩsirosar oiporarara mbahe-mbahe tẽi rasicuer omano’ ehi vahe. 19 Sese pemboasi pe angaipa; peyevi Tũpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa ãgua, 20 ombou aveira Jesús, ahe yipĩsuive iporavopri pe pĩsiro ãgua. 21 Cũritei rumo Jesucristo ivave vite secoi acoi Tũpa opase voi omoingatu opacatu mbahe iyevi ãgua. Aipo ehi acoi imoñehe uca aracahendar oñehe mombehusar ndaseco marai vahe. 22 Moisés yande ramoi yuvirecoi vahe upe aipo ehi imombehu aracahe: ‘Yande Yar Tũpa omopuhara ñepei oñehe mombehusar pe pãhuve che nungar. Ahe iñehe pesendura, pemboyeroya catu aveira. 23 Opacatu ndoviroyai vahe iñehe Tũpa omocañira gũembiporavo pãhu sui’ ehi.

24 “Ëgũe ehi opacatu Tũpa ñehe mombehusar Samuel suive aracahe omombehu avei co ari cũritei yasepia vahe yuvireco. 25 Pẽu nara niha Tũpa ñehe mombehusar remimombehugũer aracahendar. Pẽu nara avei acoi Tũpa omombehu vahe gũemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi. 26 Acoi Tũpa Guahir ombogũerayevise, pẽu rane ombou pe rovasa ãgua ‘toseyapa ñepei-pe gũecocuerai yuvireco’ oya” ehi Pedro ava rehi upe.

4

Pedro, Juan serasosa mborerecuar rovai

¹⁻² Pedro, Juan reseve oñehe viteseve ava rehii upe, ahese oñemoirosa pipe pahi eta, tũparo rãrosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi. ³ Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tẽi osoquenda yuvireco. ⁴ Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe, ⁶ pahi rerecuar ivate catu vahe Anás, Caifás, Juan, Alejandro, opacatu omu reseve. ⁷ Evocoyase güeru ucase Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

⁸ Evocoyase Pedro, Espiritu Santo pĩratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: ⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer

curusu rese. Tūpa rumo ombogüerayevi iri omano vahe pãhu sui. ¹¹ Co Jesús pe remieroïro, ahe rumo yande vîracuasa. Pe evocoyase inungar oi mopuhasar omomboño vahe ita aviye catu vahe oi movîracuasa rãgüer yepi. ¹² Ndipoi que ambuae ava sui poropîsirosa, Jesús güeraño ité oicatu oporopîsiro. Esepia, Tūpa nomboui ambuae ava tēi co ivi pipe yande pîsiro ãgua —ehi.

¹³ Mborerecuar osepiase iyembosiquiyeēhisa yuvireco, “¿Mara ehi pîha co mbia? ¡Ava tēi, ndoyembohei vahe niha!” ehi tēi yuvireco chupe. Ichui oicua Jesús remimbohegüer secose yuvireco. ¹⁴ Iyavei acoi ava semimbogüeragüer supive ité secoise, sese ndoicatu chupe oñehe mara ãgua yuvireco. ¹⁵ Ipare, “Pesē ocarve” ehi mborerecuareta yuvireco chupe. Ahe güeraño evocoyase opîta oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ēgüe ndehi” yahe chupe. ¹⁷ Yambosiquiye ava upe Jesús rer rese iñehe iriēhi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyeviño rumo oñehe yuvireco chupe:

—¿Mara ehi pe pihave? ¿Uma pîha aviye catu Tūpa rovai? ¡Pe porocuita tie oroviroya catura Tūpa ore cuaisa sui! ²⁰ Ndiyai rumo mbahe ore

rembiepia, mbahe orosendu vahe avei mombehuẽhi ãgua oreu —ehi.

²¹ Aipo ihese, mborerecuar ombosiquiye catu tẽi yuvireco. Ichui rumo omose tupriño. Esepia, ava omboetei guasu Tũpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe. ²² Evocoi ava oipisi vahe Tũpa poromondiisa ocuera ãgua, ahe oñaro catu cuarenta araviter vireco vahe sui.

Jesús reroyasar oporandu Tũpa upe siquiyeẽhisa rese yuvireco

²³ Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tẽisa yuvireco. ²⁴ Aipo rendu pare, oyoya guasu oyeroqui yuvireco Tũpa upe aipo ehi: “Ore Yar, nde niha Tũpa opacatu iva, ivi, para guasu, opacatu ipor reseve aposar ereico. ²⁵ Nde Espiritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarẽhi yuvireco?

¿Mahera vo ipihañemoñeta rai tẽi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tũpa iyavei sembiporavo amotarẽhi ãgua’ ehi aracahe.

²⁷ “Ëgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropĩsirosar Jesús, seco

maranehi vahe, amotarēhi āgua. ²⁸ Ēgüe ehi yapo opacatu nde pihañemoñeta aracahendar rupi tupri ité yuvireco. ²⁹ Iyavei cūrítei, ore Yar, emahe ore amotarēhisar rese. Embou nde pīratasa nde rembiguai oroico vahe upe siquiyeēhisa pīpe nde ñehengagüer mombehu vite āgua. ³⁰ Ipare, nde pīratasa pīpe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pīpe” ehi yuvireco oyeróqui.

³¹ Iyeroqui pare, Tūpa omboriri opacatu mbahe iñemonuhasave yuvireco chupe. Ahese Espiritu Santo opa oique yuvireco sese. Sese osiquiyeēhisa pīpe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipīratasa pīpe icuerayevi agüer yuvireco. Ipipe Tūpa osovasa catu vite opacatu yuvireco. ³⁴ Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo, ³⁵ ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Ēgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihar’ oya aipo ehi), ³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco.

² Ahe mbia rumo omboyaho sepri, ñepeiyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu.

³ Evocoyase Pedro aipo ehi chupe:

—Ananías, ¡mahera ereroya Carugar nde piha pipe Espíritu Santo mbopa ñgua, eremboyahoño tēi nde ivi repri guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco. ⁶ Ipare mbia chñhivahe yugüeru, osupi sehögüer, oipoque seraso yuvireco ñoti ñgua.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pihañemoñetasa rese pe secoña ñgua yande Yar Espíritu! Coi yugüeru nde mer tñsarar. Nde avei nde reraso ñgua yuvireco eipeve —ehi chupe.

¹⁰ Ahe ramoseve avei oviapi sehõgüer Pedro rovai. Mbia chñhivahe yuviroique, oipoque voñño ité sehõgüer seraso imer iviñ ñoti ãgua yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pìpe Tũpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tũparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehii vñnose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihãgüer. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe, caruguar rese yuvirecoi vahe apóstol upe imbogüerapirã. Ahe evocoyase opacatu ombogüera yuvireco.

Apóstol yamotarẽhipri yuvirecoi

¹⁷ Ichui tẽi pahi rerecuar ivate catu vahe, sãduceo yuvirecoi vahe oñemoiro yuvireco apóstol upe ava rese güecatẽhisave. ¹⁸ Sese oipisi osoquendapa uca yuvireco. ¹⁹ Ipare rumo, pĩtu pìpe, Tũpa rembiguai ìva pendar ou omboi oquenda, vñnose ichui, aipo ehi chupe: ²⁰ “Peso tũparo guasuve, pemombehu avei ava upe co ñehesa tecocuer piasu resendar” ehi chupe. ²¹ Co mbahe rendu pare,

supi tupri ité oyapo yuvireco. Cõhe ramoseve yuviraso judío tũparo guasuve ava mbohe ãgua.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha ãgua ivate catu vahesave; omondo yuvireco güembigui apóstol reru ãgua soquendasa sui aheve nara viña. ²²Oyepotase rumo sembiguai yuvireco, oseca tẽi soquendapri. Ichui oyevĩ tẽi yuvireco imombehu ²³aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipri rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tẽi yuvireco.

²⁴Osenduse, pahi rerecuar ivate catu vahe, tũparo rãrosar rerecuar, pahi rerecuareta avei yuvireco, ipihañemoñeta tẽi: “¿Que rupi vo opoira co mbahe sui yuvireco?” ehi tẽi yuvireco oyeupe.

²⁵Aheseve ñepeĩ mbia oyepota imombehu:

—Evocoi pesoquenda vahecuer, ahe mbia cũritei oporombohe tũparove yuvireco —ehi chupe.

²⁶Evocoiyase tũparo rãrosar rerecuar, sembiguai avei yuviraso seru ãgua mbahe tupri pipe, “Aviyeteramo yande api-api tiẽtera ava yuvireco yaru raise” ehi yuvireco. ²⁷Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸—Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava

rehĩ upe ore mborerecuar oroyuca uca evocoi mbĩa —ehi pahĩ rerecuar chupe.

²⁹ Pedro, omboetasa reseve, omboyeveĩ pahĩ rerecuar ivate catu vahe upe yuvireco:

—Ore cuaita ité Tũpa mboyeroya, ndaheĩ chira rumo ava tẽĩ rane oromboyeroƧara —ehi yuvireco chupe—. ³⁰ Yepe peyatica, peyuca uca Jesús curusu rese viña, yande Ru Tũpa rumo acoi yande ramoĩ eta viroya vahe, ahe ité ombogũerayeve. ³¹ Ipare osecomboivete ivave oacato coti imboguapi imoi. Ahe niha Mborerecuar guasu, Poropĩsirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tũpa Israel suindar upe. ³² Ore Tũpa rembiapo repiasarer imombehu ãgua oroico, Espĩritu Santo avei oñehe ore ñehe rupi ava upe, ahe acoi Tũpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña. ³⁴ Mborerecuar pãhu pendar rumo oime mbĩa fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opũha oporocuai, “Toyuvĩnose raimi ocarve apóstol” ehi. ³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo ãgua renondeve co mbĩa upe yuvireco —ehi—. ³⁶ Peyemomahenduha Teudas recocuer rese. Esepia niha, acoi oyemboivete aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai

tēi yuvireco. Ahe peve secocuer opa. ³⁷ Coiye catu, omombehuse mborerecuar Roma pendar ava retacuer cua āgua, ahese Judas, Galilea pendar, oyemomborecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. ³⁸ Sese cūritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopi chira oyapose opĩratasa pipe tēi yuvireco. ³⁹ Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. ⁴⁰ Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco. ⁴¹ Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi. ⁴² Ipare ndopoi eté ari yacatu Poropĩsirosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pĩtivii āgua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropĩtiviisa imondosase

chupe” ehi oñehe yuvireco. ² Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropitivüisa mondo ñgua rese tēi —ehi yuvireco—. ³ Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espiritu Santo viroya vahe ité opiha pīpe. Ahe mbia tihañeco co mboraviquisa rese yuvireco. ⁴ Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pīpe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyerogui yuvireco sese.

⁷ Ahese Tūpa Ñehengagüer oyemosai catu tecua pīpe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

Esteban pisisa

⁸ Co mbia, Esteban, viresco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi

Esteban yuvireco. ¹⁰ Ndoicatui rumo ñehe recopi ãgua yuvireco. Esepia, ahe oñehe mbahecuasa Espiritu Santo omondo vahe pipe. ¹¹ Evocoyase yamotarẽhimbar omboepi ambuae ava upe semira tẽi ãgua sese yuvireco. “ ‘Ore orosendu co mbia oñehese mbahe naporai vahe rese Moisés amotarẽhisave, Tũpa amotarẽhisave avei’ aipo peyera peñehe” ehi yuvireco chupe. ¹² Evocoyase ahe ava oyamotarẽhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tẽi vahe oñehe vajerã sese yuvireco. Ahe aipo ehi:

—Co mbia oñehe-ñehe tẽi yande tũparo guasu imaranehi vahe amotarẽhisave, Moisés porocuita amotarẽhisave avei. ¹⁴ Ore orosendu ñehe: “Jesús Nazaret pendar omocañira tũparo guasu iyavei Moisés yande mbohesa avei aipo osecuñarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyaviñi sepiaca Tũpa rembiguai ìva pendar rova.

7

Esteban oñehe oyepisa pipe

¹ Evocoyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyevi chupe: “Che mu eta, peyapisaca che ñehe rese: Tũpa imboeteipri oyemboyecua yande ramoi Abraham

upe aracahe. Mesopotamia ve secoi vıtese, icho renondeve Harán ve seco ãgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecuará ndeu’ ehi Tũpa chupe. ⁴ Evocoiyase osẽ Caldea ivı sui oso tecua Harán ve güeco ãgua. Omano pare tu Harán ve, Tũpa ombou cohava yande recosave. ⁵ Yepe oyepota tẽi cohava aracahe, Tũpa rumo nomondoimi eté que chĩhi ivı chupendar chupe. ‘Co ivı amondora ndeu nde mano pare nde suindar upe nara’ ehi Tũpa chupe (ahe rumo ndatahi vıtei ahese). ⁶ Tũpa aipo ehi avei chupe: ‘Nde suindar yuvırecoira ambuae ava recua rupı, ahe pendar ava secua vahe rembiguairã semimombaraisuguã tẽi avei yuvırecoira cuatrociento aravıter rupı’ ehi. ⁷ Tũpa rumo aipo ehi avei Abraham upe: ‘Che rumo, aicuará evocoi ava nde suindar mombaraisusar upe yuvıreco. İpare yuvınosera ipovrı sui che mboetei iri ãgua cohava yuvıreco’ ehi Tũpa chupe aracahe. ⁸ Tũpa oyocuai güemimbotar pıpe Abraham guahır mbo-circuncida ãgua rese. Sese Abraham ombocircuncida guahır Isaac iha pare ocho arı pıpe. Isaac ẽgüe ehi avei guahır Jacob upe. Jacob ẽgüe ehi avei guahıreta upe, ahe doce vahe Israel suindar” ehi.

⁹ “İpare yuvırecoi vahe yande ramoi Jacob rahır omondo vıvrı guarepochi repırã yamotarẽhısa pıpe yuvıreco. Ahe tivrı rer José omondo vahe Egipto pendar upe yuvıreco. Tũpa rumo secoiño ité sese. ¹⁰ Ichui vınose opacatu iparaısusa sui. Omondo ombahecuasa chupe iyavei seco avıye tuprı ãgua Egipto pendar mborerecuar guasu faraón upe. Evocoiyase faraón ipotasa pıpe

omoiogue mborerecuar seco ãgua opacatu ava ivi Egipto pendar cuai ãgua iyavei güëta pïpendar cuai ãgua avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. ¹² Oyanduse rumo Jacob Egipto ve oime vïtese trigo, ahese omondo guahir aheve seca, ahe yande ramoi yuvirecoi vahe. Ahe yïpïndar ichosa Egipto ve yuvireco. ¹³ Ichui yuvïraso yupagüe irise Egipto ve, ahese José oyecua uca vïquehir upe. Ëgüe ehi faraón upe oicua uca uma sui oyesu. ¹⁴ Evocoiyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ Ëgüe ehi Jacob yuvïraso Egipto ve yuvirecoi ãgua opacatu guahir reseve. Aheve omano iyavei opacatu yande ramoi eta omano yuvireco aracahe. ¹⁶ Imano pare rumo, suminogüer vïraso icangüer yuvireco tecua Siquem ve. Aheve oñoti yuvireco. Aheve acoi Abraham vïrocua tuvïpa Hamor rahir sui aracahe” ehi mborerecuar upe.

¹⁷ “Ipare, vïrovise ari ipapapri Tüpa Ñehengagüer Abraham upendar, ahese yande ramoi setá catu-catu iri oyesu Egipto ve yuvireco aracahe. ¹⁸ Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. ¹⁹ Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pïtani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe. ²⁰ Aheseve avei aipo Moisés oha. Ahe pïtani avïye

ité Tūpa uve. Ihare, iyesupa mbosap̄i yas̄imi rupive vireco oyese güētave yuvireco. ²¹ Oseyase rumo iyesupa ive yuvireco, ahese faraón rayri oseca ahe i rupi sui. Ichui vinose seraso güētave, omboacua omembr̄i nungar ité sereco. ²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ip̄irata ité oñehese iyavei oya-
pose mbahe.

²³ “Virecose rumo Moisés cuarenta araviter, ipihañemoñeta: ‘Tasepia rane che mu israelita cohave yuvirecoi vahe’ ehi. ²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu rep̄icave. ²⁵ Ahe rumo, ‘Oicua revo che mu Tūpa vinose uca ãgua Egipto sui yuvireco cheu’ ehi viña. Imu rumo nomohai eté Moisés vinose ãgua yuvireco evocoi ava po sui. ²⁶ Ahere ayihive oso omu pãhuve. Aheve osepia ñuvirío mb̄ia ovavase oyeupe yuvireco. Ahe rumo oipota t̄ei iñero ãgua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi t̄ei chupe. ²⁷ Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhuve ore rerecuarã ore recocuer moingatu ãgua?’ ehi chupe. ²⁸ ‘¿Che yuca pota avei tie eve inungar ereyuca evocoi Egipto pendar irap̄ipe!’ ehi chupe. ²⁹ Osenduse rumo co iñehe, oñemi voi eté oso Egipto sui ambuae iv̄i Madián ve. Aheve op̄ita pucu. Ahe iv̄i rumo ndahei secua ité. Aheve oyesu ñuvirío tahir.

³⁰ “Omboaviyese cuarenta araviter Madián

ve, Tūpa rembiguai oyemboyecua ivitri Sinaí rerovicave ivi iporupirēhisave caha rese tata rendigüer pāhuve chupe. ³¹ Osepiase mbahe sendi vahe oyepihamondi, oyemboya catu sese sepia tupri āgua viña. Ahese osendu Yar ñehe aipo ehi vahe: ³² ‘Che nde ramoi Tūpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoyase Moisés oriri osiquiyesa pipe nomahé pota iri sese. ³³ Evocoyase Yar aipo ehi chupe: ‘Esequi nde pitaqui. Esepia, ivi nimarai vahesave ereico’ ehi chupe. ³⁴ ‘Che asepiatupri ité Egipto ve nde mu che rembiporavo paraisuse; asendu avei ipoãse tēisa yuvireco yepi. Sese agüeyi ndeu nde oromondora aheve senosepa āgua’ ehi Tūpa Moisés upe aracahe.

³⁵ “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarã ore recocuer moingatu āgua?’ ehiño yuvireco chupe, Tūpa ité rumo oyocuai güembiguai imbogüeyi tata rendigüer pāhuve imoñehe Moisés upe iporocuai āgua, ava renosepa āgua avei ivi Egipto pendar mborerecuar povri sui. ³⁶ Ipare ahe ité vinose yande ramoi eta Egipto sui, oyapo avei mbahe poromondiisa aheve ‘toicua Tūpa yuvireco’ oya, para guasu Pira vaheve avei oyapo poromondiisa iyavei ivi iporupirēhisa rupi avei cuarenta araviter rupi. ³⁷ Ahe avei aipo ehi israelita upe: ‘Tūpa vinosera pe pāhu sui ñepeí oñehe mombehusar che nungar’ ehi. ³⁸ Ahe avei acoi ivi iporupirēhisa rupi ava pāhu rupi secoi. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yan-

deu imbou ãgua.

³⁹ “Yande ramoi eta rumo nomboyeroia potai eté Moisés yuvireco. Ipihañemoñetaño ité Egipto ve oyevi ãgua rese yuvireco. ⁴⁰ Evocoyase aipo ehi Aarón upe yuvireco: ‘Eyapomi catu ava tũpa rahanga oreu ore reroguata ãgua’ ehi yuvireco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tẽi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mĩmba ahe mbahe rahanga upe viropovẽhe vaheã yuvireco iyavei oyemboviha pieta apo yuvireco güembiapo ucagüer rese tẽi. ⁴² Sese Tũpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehúsar icuachiapri pipe:

‘Pe peico vahe israelita, ndahei cheu peyuca mbahe mĩmba seropovẽhe ãgua cuarenta araviter pipe ivi iporupirẽhisa rupi.

⁴³ Pe rumo che mboeteiẽhisa pipe peraso tũpa rahanga Moloc rẽta iyavei yasitata rahanga Refán pe ae tẽi peyapo vahe pe tũpaguã.

Sese che opovinosera pe recua sui pe mondo Babilonia cupe coi coti’ ehi Tũpa chupe aracahe.

⁴⁴ “Ivi iporupirẽhisa rupi yande ramoi eta vireco Tũpa porocuita rẽta oyeupive yuvireco aracahe mbahe mĩmba pিরer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca. ⁴⁵ Ahese coiye catu yande ramoi eta vireco co oi Tũpa rẽta mbahe pিরer apopri yuvireco iyavei Josué rupi yugüeru vahe güeruño ité avei yuvireco,

omosepase Tūpa ambuae ava co yande recuavi sui. Ëgüe ehiño vite ité ahe sereco yuvireco mborerecuar guasu, David, secoise aracahe. ⁴⁶ Ahe David aviye ité Tūpa upe, oyapo pota setarã ‘toime tūparoguã yande ramoi Jacob rembieroya upe’ oya. ⁴⁷ Tahir Salomón rumo omopuha ité ahe tūparo. ⁴⁸ Tūpa rumo, seco ivate vahe, ndasecoi vahe tūparo ava tēi rembiapo pīpe. Inungar acoi omombehu vahe Tūpa ñehe mombehusar aracahe aipo ehi:

⁴⁹ Iva che renda iyavei ivi che pīrunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

⁵⁰ Che niha opacatu co mbahe aposar aico’ ehi Tūpa icuachiapri pīpe” ehi mborerecuar upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espíritu Santo amotarēhimbar tēi inungar pe ramoi aracahe yuvirecoi. ⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūritei ou ndaseco marai vahe cute. Pe avei evocoyase ahe yuca uca ãgua peporocuai. ⁵³ Pe pereco tēi Tūpa porocuita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

54 Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco. 55 Esteban rumo vireco ité Espíritu Santo oyese. Evocoyase iva rese omahese, osepia Tūpa porañetesa. Osepia avei Jesús opūha ohã Tūpa acato coti. 56 Evocoyase aipo ehi:

—¡Pesepia! Asepia inungar iva imboipri. Aheve asepia Ava Riqueh̄ir Vu acato coti ihã —ehi.

57 Mborerecuareta rumo osapucaí pĩrata, oyopiño oapisacuar yuvireco ichui. Aheve yuvinoña guasu yuvireco chupe. 58 Viraso güecua ivi yuvireco. Aheve oseyá oyeaosa Saulo pive ‘tosãro’ oya yuvireco chupe. Ipare oyapi-yapi ita pipe yuca yuvireco.

59 Oapi-apiseve, Esteban oyerure Tūpa upe: “Che Yar Jesús, eipisi che hã” ehi. 60 Ipare oñenopiha, oñehe pĩrata Tūpa upe: “¡Che Yar, ndeñero co ava che amotarēhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohã.

Saulo oseca Jesús reroyasar mocañipa ãgua oico

Ahe arí pipeve omboipi Jesús amotarēhimbar seroyasar reca mara-mara tēi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tūpa mboeteisar yuvirecoi vahe, ahe víraso Esteban rehögüer ñoti yuvireco.

Itĩ pare, oyasehó iteanga yuvireco sese. ³ Ahe pĩpeve avei aipo Saulo omombaraisu ava Jesús reroyasar yuvirecoi vahe seroya ucaẽhi ãgua viña. Yuviroique-iqueño tẽi aipo sêta rupi cuimbahe, cuña mbotiriri senose soquenda ãgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: “Evocoi Jesús Tũpa Rembiporavo ava pĩsiro ãgua” ehi. ⁶ Ahese ava rehii oñemonuha Felipe ñehe rendu ãgua yuvireco. Oyapisaca tupri ñehe rese yuvireco. Esepia, osepia mbahe sembiapo poromondĩisa. ⁷ Iyavei setá ava carugar rerecosar sui omose carugar. Osẽse ava sui, sãse yuvireco. Iyavei setá ava nomii vahe, ndoguatai vahe avei ombogüera. ⁸ Evocoiyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa. ¹⁰ Evocoiyase opacatu ava, cuacua vahe iyavei chĩhivahe catu vahe oyapisaca tupri ñehe rese, aipo ehi yuvireco: “Co niha Tũpa pĩratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tũpa mborerecuasa resendar, Jesucristo recocuer resendar avei. Ahese ava rehii

viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tũpa suindar ndayasepiái vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tũpa Ñehengagüer yuvireco. Evocoyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya. ¹⁶ Esepia, Espíritu Santo ndogüeyi vitei yuvireco sese; oñeapiramonoñ tēi vite yande Yar Jesús rer pipe yuvireco. ¹⁷ Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:

—Cheu avei pemboumi tēi evocoi pĩratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumbo Simón upe:

—¡Tocañipa nde guarepochi nde reseve! Esepia, ndepihañemoñeta co Tũpa ombou vahe oreu, ererocua vaherā nde guarepochi pipe viña —ehi chupe—. ²¹ Ndeu ndiyai co nungar mbahe apo āgua. Esepia, nde pihañemoñetasa ndahei ihivi vahe Tũpa rovaque. ²² Sese epoi nde pihañemoñeta raisa sui, eyerure Tũpa upe. Aviyeteramo iñerora ndeu —ehi—. ²³ Aicua nde pihā naporai vite iyavei nde pihañemoñeta raisa pipe vite ereico —ehi chupe.

24 Evocoyase Simón omboyeve chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

25 Yande Yar ñehesa mombehu pare ahe tecua pendar upe, apóstol omombehu-mbehu co ñehesa písirosa resendar Samaria pïpendar tecua rupi yuvireco. Ëgüe ehi oyepota yuviroyeve Jerusalén ve yugüeru.

Felipe omombehu Jesucristo recocuer Etiopía pendar upe

26 Ipare Tüpa rembiguai oyemboyecua Felipe upe aipo ehi chupe: “Epüha, eso irohi coti nde yepota ägua evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirëhi rupi oso. 27 Evocoyase opüha oso peri rupi. Aheve osovañchi ñepeï ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbïa oso vahe Jerusalén ve Tüpa mboetei ägua. 28 Oyevise ocãreto pïpe, oyerocuï Tüpa ñehe mombehusar Isaías rembicuachiagüer rese ou.

29 Evocoyase Espíritu aipo ehi Felipe upe: “Eyemboya cãretomi rese” ehi. 30 Evocoyase virovise ahe ava, osendu iyeroquï Isaías rembicuachiagüer pïpe oï. Ahese oporandu chupe:

—¿Eresenducua aipo Tüpa Ñehengagüer nde yeroquisa eï? —ehi chupe.

31 Etiopía pendar mbïa omboyeve chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohave che p̄iri” ehi Etiopía pendar chupe. ³² Ahe Isaías rembicuachía oyerogui vahe p̄ipe aipo ehi:

“Inungar ava v̄iraso ovesa yuca ãgua, ãgüe ehi avei ahe mb̄ia seraso yuca ãgua yuv̄ireco.

Iyavei inungar ovesa nasasei eté guagüer rocuase, ãgüe ehi avei ahe mb̄ia noñehi eté.

³³ Osecomomini yuv̄ireco, ndipoi ava sep̄isar.

Ndipoi ichuindar.

Esepia, omocañi co īvi sui yuv̄ireco” ehi Isaías rembicuachía p̄ipe.

³⁴ Oyerogui pare ahe Etiopía pendar oporandu chupe:

—Emombehumi cheu: ¿Ava rese p̄iha aipo Isaías oñehi: oyese ae p̄iha, ambuae ava rese tie? —ehi.

³⁵ Evocoiyase co ñehesa sui omombehu ñehesa aviye vahe Jesús recocuer resendar Etiopía pendar upe. ³⁶ Ipare oguata catuse yuv̄ireco, Etiopía pendar osepia i. Aheve ahe aipo ehi chupe:

—Esepia co ī tui. ¿Ndiyai vo cohave che ãpiramomi t̄ei eve viña? —ehi.

³⁷ Ahese omboyevi chupe:

—Eeroya itese opacatu nde p̄iha p̄ipe, iya ité ndeu —ehi.

—Aroya ité niha Jesucristo ahe Tũpa Rah̄ir secoi —ehi.

³⁸ Evocoiyase omombita uca ocãreto, ichui ogüeyi īve yuv̄iraso. Aheve Etiopía pendar Felipe oñapiramo. ³⁹ Yuv̄inosese ī sui, yande Yar Esp̄iritu v̄iraso ahe Etiopía pendar sui. Ahese ndosepia iri; ãgüe ehiño vor̄ivete oso per̄i rupi. ⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer

opacatu tecua rupi. Ēgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ²oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohave nde rer pipe” ehi, “evocoyase eremombehura cuachiar pipe Damasco pendar tûparo rerecuar upe” ehi pahi rerecuar ivate catu vahe upe. ³Ēgüe ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tēi osesape guasu iva sui chupe. ⁴Evocoyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶“Epūha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiai eté ivate oñehe vahe yuvireco. ⁸Ipare Saulo opūha, omahe tēi; ndoicatui rumo mbahe repia. Ichui supindar oipisi iyiva rese seraso Damasco ve yuvireco. ⁹Aheve mbosapi ari ndas-esapiso, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboye-cua yande Yar aipo ehi chupe: “¡Ananías!” ehi. “Co aico, che Yar” ehi imboyevi chupe.

¹¹ Evocoyase yande Yar aipo ehi chupe: “Epũha, eso calle Ihĩvi serer vahe rupi. Eporandu Judas rõtave Saulo, tecua Tarso pendar, rese. Ahe oyerogui cũritei. ¹² Oquerve angahu osepia mbia Ananías serer vahe omondose opo iharive omboesapiso iri” ehi.

¹³ Evocoyase omboyevi chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tẽi oyapo vahe nde reroyasar reco maranehi upe Jerusalén ve. ¹⁴ Cũritei ou rutei ahe mbia pahĩ rerecuar porocuita rupi opacatu nde rer rese oyeroya vahe roquendapa ãgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheerã ava ndahei vahe judío upe iyavei serecuar guasu yuvirecoi vahe upe, judío upe avei. ¹⁶ Che ae amboyecuar setá mbahe tẽi chupe oiporara vaheerã che remimbotar mboaviye ãgua” ehi yande Yar chupe.

¹⁷ Evocoyase oso secosave. Oiquese ahe oi pĩpe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboye-cua vahe ndeu perĩ rupi nde yuse, ahe che mbou ndeu nde mboesapiso iri ãgua. Toique avei catu Espĩritu Santo nde rese —ehi Saulo upe.

¹⁸ Ahese voi eté pira pirer nungar mbahe ovĩapipa sesa sui. Ahese voi sesapiso iri. Ichui

opũha. Ipare voi Ananías oñapiramo. ¹⁹ Ipare Saulo ocaruse, ipĩrata catu iri. Moviro ari tẽi opĩta iri Jesús reroyasar piri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tũparo yacatu rupi Damasco ve aipo ehi: “Jesús Tũpa Rahir ité secoi” ehi ahe pendar ava upe. ²¹ Ava opacatu osendu vahe iñehe,

—¿Mara ehi pĩha co? —ehi tẽi yuvireco—. ¿Ndahei vo acoi co mbĩa Jerusalén ve Jesús reroyasar mara-mara tẽi vireco vahe? ¿Ndahei vo acoi co avei ou cohava ava Jesús reroyasar ha pendar pĩsi ãgua serasopa ãgua avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tũpa Rembiporavo ava pĩsiro ãgua secosa. Sese ndoicatui judío iñehe mboyevi yuvireco.

Saulo oñemi omu sui oamotarẽhise

²³ Setá ari pare judío ahe pendar omboguai yuca ãgua Saulo yuvireco viña. ²⁴ Ahe rumo oyandu omboguaisa judío osãrose tecua ãchisa roquendipive ari, pĩtu momba yuvireco yuca ãgua viña. ²⁵ Jesús reroyasar rumo pĩtu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tẽi Jesucristo reroyasar rese.

Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tẽira yandeu” ehiño oyeupe yuvireco. ²⁷ Ipare rumo Bernabé viraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeẽhisa pipe Damasco ve Jesús recocuer rese” ehi. ²⁸ Evocoyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeẽhisave. ²⁹ Oiñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espíritu Santo oipĩtivii iyemboeta catu ãgua yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. ³³ Aheve osepia mbia Eneas serer vahe, ahe ndoguatai vahe. Vupave tẽi tui vahe ocho araviter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopitivii yepi. ³⁷ Imbaheasi guasu rumo. Coiye omano. Ipare ava sehögüer oyo-sei yuvireco. Ichui viroyeupi oi ivate vahesave seraso yuvireco. ³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirio mbia seru poyava ñgua Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oĩ. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Serãcua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoyase Pedro

opita setá ari aheve, mbia mbahe pিরer mopítasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Tūpa opacatu guahir, güembireco reseve yepi. Iyavei omondoño ité judío pítivi ãgua guarepochi, oyerogui avei Tūpa upe yepi. ³ Ñepe ari, caharuse las tres rupi, osepia oquer nungar pipe Tūpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tūpa rembiguai rumo omboeyi chupe: “Tūpa oipisi nde yeruresa; osepia avei nde poroparisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pিরer mopítasar piri. Ahe sēta para guasu popive chini” ehi chupe.

⁷ Orose Tūpa rembiguai ichui, Cornelio oñehe ñuvirío güembiguai upe iyavei ñepe sundao Tūpa mboeteisar upe, sese acoi oyeroya vahe yepi. ⁸ Opacatu Tūpa rembiguai ñehe mombehu pare, omondo Jope ve.

⁹ Ahere ayihive vırovisē Jope yuvıraso, Pedro oyeupi oi ipe vahe harıve mbıter ari senise oyerogui ãgua. ¹⁰ Vieporēhıse ocaru pota viña. Omoingatu vıteseve rumo semihura yuvıreco, avıyeteramo tēi osepia mbahe oquer pendar nungar: ¹¹ ahese osepia ıva oyemboise, ahe ichui turucuar tuvıcha vahe pipe ogüeyi mbahe, ñapıchimbri

ipopi yacatu ou chupe. ¹² Ahe turucuar pipe, osepia opacatu mahembiar vai, mboi, vĩrai vai tēi avei. ¹³ Ahese osendu ñehesa aipo ehi vahe: “Pedro, epũha, eyuca, ichui ehui” ehi chupe.

¹⁴ Pedro rumo omboyeve chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tũpa remimbocatupri upe, ‘Ava remimbotarēhi, ndihusai vahe’ nderei chira” ehi.

¹⁶ Ĕgũe ehi mbosapi oyupagũer rupi chupe. Ipare turucuar oyeve ivave oso. ¹⁷ Pedro ipihañemoñeta vitesese mbahe osepia vahecuer rese oquer nungar pipe: “¿Mbahe rese pĩha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rēta roquendipive yuvireco. ¹⁸ Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta vitesese Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egũeyi chupe, eso supi. ‘¿Asora pĩha?’ erei rene. Esepia, che ambou evocoi mbia nde reca” ehi Espiritu Santo Pedro upe.

²¹ Evocoyase ogũeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyeve iñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ñvi vahe, Tūpa mboeteisar opacatu judío osaisu, oipota rai yuvireco. Tūpa rembiguai oyocuai nde rese ereso vaherã sêtave, ahe osendu vaherã nde ñehesa —ehi yuvireco Pedro upe.

²³ Evocoyase omoinguepa, omombitapa oyepiri ñepepi pĩtu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sêtave. Cornelio rumo osãro opacatu omu eta rese yuvireco iyavei omboriparete güembisoho reseve avei. ²⁵ Oyepotase sêtave oso, Cornelio rane osẽ voi, osovaĩchi, oñenopiha sovai imboeteisa pipe. ²⁶ Pedro rumo aipo ehi chupe:

—Epũha, che niha nde nungar avei aico —ehi chupe.

²⁷ Evocoyase ahe omoñeta seroi que seraso oi pipe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío piri. Aní chiveira pembori evocoi ava peico” ehi acoi —ehi Cornelio rēta pipendar upe—. Tūpa rumo omombehu cheu che quer nungar pipe: “ ‘Ava remimbotarēhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoyase nacheatēhi che yu ãgua pẽu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohave che rētave aicose, ndacarui eté che yerure āgua Tūpa upe. Aheseve oyemboye-cua mbia Tūpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaisuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pirer mopitasar. Ahe sēta para guasu popive chini” ehi cheu. ³³ Sese amondo voi eté nde reca āgua. Aviye nde ereyu cohave. Cūritei co opacatu yaico cohave Tūpa rovaque. Orosendu pota opacatu nde ñehe yande Yar nde cuai vahe nde ñehe āgua oreu —ehi Cornelio chupe.

Pedro oñehe Cornelio rētave

³⁴ Evocoyase Pedro aipo ehi chupe:

—Aicua cute, supi eté Tūpa nomboyahoi yande raisu. ³⁵ Sese ambuae ivi pīendar omboetei vahe Tūpa, oyapo vahe avei mbahe tupri yuvireco, ahe oipisira Tūpa. ³⁶ Aracahe Tūpa oñehe avei Israel suindar upe, omombehu ñehesa tupri yeamotarēhiēhisa resendar Jesucristo rembiaporā sui, ahe opacatu ava co ivi pīendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tūpa omondo Jesús Nazaret pendar upe opīratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe caruguar povrive yuvirecoi vahe. Esepia, Tūpa secoi sese. ³⁹ Ore

orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. ⁴⁰ Tũpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oiñu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tũpa Rembiporavo, aico opacatu ava recocuer rese porandu ãgua oicove vite vahe, omano vahe avei” ehi oreu. ⁴³ Ahe secocuer avei opacatu Tũpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tũpa ñeroisa serer pipe angaipa rese yuvireco” ehi—ehi Pedro Cornelio rêta pipe yuvinoi vahe upe.

Espíritu Santo oique ava ndahei vahe judío pĩha pipe

⁴⁴ Pedro oñehe viteseve, Espiritu Santo ogüeyi opacatu ava osendu vahe rese. ⁴⁵ “¡Too! Evocoiyase ndahei vahe judío upe avei Tũpa omondo Espiritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tũpa upe. ⁴⁷ Evocoiyase aipo ehi vupindar upe:

—¿Oime pĩha ndoipotai vahe co ava ñeapiramo ãgua yande pãhu pendar? Esepia, co oipisi Espiritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco — ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoiyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñhengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroiro sovai eté yuvireco, ³ aipo ehi:

—¡Mahera eresoño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui. ⁶ Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tūpa remimbocatupri upe, ‘Ava remimbotarēhi’

erei rene” ehi cheu. ¹⁰ Ëgüe ehi mbosapî oyupagüer rupi cheu. Ipare opacatu oyevi iri ivave oso. ¹¹ Aheseve avei mbosapî mbîa imbouprî Cesarea sui oyepota yuvireco che recosave che reca. ¹² Espîritu Santo che cuai che so âgua che atêhiêhîsa pîpe supî yuvireco. Co seis mbîa Tûpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rêtave. ¹³ Ahe omombehu oreu osepia vahecuer güêtave Tûpa rembiguai oyemboyecua vahe sovai iyavei aipo ehi vahe chupe: “Emondo mbîa tecua Jope ve Simón Pedro reru âgua. ¹⁴ Ahe omombehura ndeu nde ñepisîro âgua iyavei opacatu nde rêta pendar ñepisîro âgua avei” ehi Tûpa rembiguai Cornelio upe —ehi—. ¹⁵ Añehe ramoseve chupe, Espîritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supî eté î pîpe Juan oporoâpiramo, pe rumo Espîritu Santo pîpe peñeapiramora” ehi vahe. ¹⁷ Tûpa Espîritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tûpa ayamotarêhîra —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tûpa ombou avei ndahei vahe judío upe secocuer recuñaro âgua, tecovesa apîrêhî vahe rereco âgua! —ehi Tûpa mboeteisa pîpe yuvireco.

Ava Jesús reroyasar Antioquía ve

19 Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarẽhimbar oyamotarẽhi catu yuvireco. Evocoiyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. 20 Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. 21 Yande Yar pĩratasa vireco yuvireco. Evocoiyase setá ava viroya; oseyá ité yipindar güembieroya yuvireco yande Yar reroya água.

22 Serãcua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. 23 Oyepotase aheve, osepia Tũpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. 24 Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

25 Ipare oso Tarso ve Saulo reca. 26 Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepeí araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipindar, “Cristo reroyasar” ehi yuvireco.

27 Aheseve Tũpa ñehe mombehusar yugüeru Antioquía ve Jerusalén sui. 28 Ñepeí ipãhu pendar,

Agabo serer vahe, opũha aipo ehi Espiritu Santo pĩratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose). ²⁹ Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pĩtivii ãgua yuvireco ocatugüer rupi. ³⁰ Ègüe ehi yande Yar reroyasar rãrosar Judea pendar upe porerecosa mondo. Bernabé, Saulo ahe porerecosa vıraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan rıquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sãro ãgua yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. ⁵ Evocoyase Pedro opita voquendasave sãrombri tupri chini. Jesús reroyasar rumo oyoeroqui pĩrata Tũpa upe yuvireco sese.

Tũpa omose uca Pedro soquendasa sui

⁶ Ahe ari vınose potase Herodes Pedro soquendasa sui, ahe pĩtu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa

roquendipive. ⁷ Aviyeteramo tēi Tūpa rembiguai oyemboyecua ique viteseve chupe. Ahe sendi guasú iteanga soquendasa pipe. Ahe oñatoi Pedro iqueve imomahe: “¡Epūha poyava!” ehi chupe. Ipūhase, opa voi oyera carena ipo sui. ⁸ Ahe Tūpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeaosa, eyu che raquicuei” ehi chupe.

⁹ Ēgüe ehi oso saquicuei. Ahe rumo ndoicuai Tūpa rembiguai oyeupe ēgüe ehise. Ndoyavii iquerve tēi ēgüe ehi vahe chupe. ¹⁰ Ichui yuvinose, oñocua yipindar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose āgua yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tēi Tūpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tūpa ombou cheu güembiguai che renose āgua Herodes povri sui. Tūpa che pĩsiro judío rereciar che yuca rāgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rētave oso. Aheve setá ava oñemonuha oyerogui yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osē imboi āgua chupe. ¹⁴ Osenduse rumo Pedro ñehe, oquenda omboi rāgüer sui, oña oique oi pipe vorivetesave, omombehu: “Pe Pedro ihāi oquendipive” ehi oi pipendar upe. ¹⁵ Ahe rumo,

—¿Nanderocoi vo eico? —ehiño yuvireco chupe.
 “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sãrosar
 —ehiño yuvireco chupe.

¹⁶ Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tẽi sepiase yuvireco. ¹⁷ Pedro rumo opo omopuha imonguiriri ãgua. Ichui opa omombehu yande Yar opisiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

¹⁸ Cõhese sundao oyepihamondii eteanga yuvireco. “¿Que pñha Pedro?” ehi tẽi oyeupe yuvireco. ¹⁹ Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tẽi chupe. Sese oyocuai ambuae sundao opacatu ahe sãrosar yucapa ãgua. Ipare Herodes osẽ Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaheã mborerecuar rovai. Ahe evocoyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuita sui oipisi mbahe güemihura yuvireco.

²¹ Herodes evocoiyase omombehu ari oñehe va-herã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oĩ. Aheve oñehe ava rehi upe. ²² Evocoiyase ava rehi osapucái pĩrata yuvireco aipo ehi: “¡Cobia oñehe vahe ndahei ava tẽi, Tũpa itel!” ehi yuvireco Herodes upe imboeteisave. ²³ Ava aipo iheseve voi, ñepei Tũpa rembiguai oyapo mba-herasi guasu chupe. Ichui mbahe rasoí ocaru yaviter rupi yuvireco. Esepia, nomboetei eté Tũpa. Sese omano.

²⁴ Tũpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

13

Tũpa oiporavo Bernabé, Saulo oyeupe mboraviqui apo ãgua

¹ Evocoiyase Jesús reroyasar Antioquía pendar pãhuve oime Tũpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. ² Ñepei ari opacatu Jesús reroyasar oñemonuhase yande Yar mboetei ãgua, oyecuacu avei, ahese Espiritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo ãgua” ehi Espiritu Santo yuvireco chupe.

³ Evocoyase oyoeroqui pare, omondo opo yuvireco iporavopri ãca harive sovasa ãgua. Ipare omondo yuvireco ambuae tecua rupi Jesús recocuer mombehu ãgua.

Apóstol yuvirecoi Chipre rupi

⁴ Evocoyase Bernabé, Saulo Espíritu Santo remimondo yuviraso Seleucia ve. Ichui yuviraso carite pipe caha pãhu Chipre ve. ⁵ Oyepota yemboyasa Salamina ve yuviraso. Aheve omombehu Tũpa Ñehengagüer judío tũparo rupi yuvireco. Juan avei oso supi ipĩtivii ãgua.

⁶ Opase ité oguata caha pãhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tũpa Ñehengagüer rese” ehi tupri tēi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tũpa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoyase Saulo, Pablo serer vahe, vireco ité vahe Espíritu Santo opiha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Maha nderepoi potai yande Yar porombohesa supi eté vahe reroĩrosa sui. ¹¹ Eyapisaca, cūritei yande Yar nde mombaraisura. Nande mboesapisoi chira

moviro ari rupi. Ichui ndereicatu iri chietera ari rendigüer repia ãgua —ehi Pablo chupe.

Aipo ehi ramoseve voi, opacatu p̄tumimbi chupe. Oñehe t̄i ava güeraso ãgua upe. ¹² Ahe mbahe repiase, mborerecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquia ve Pisidia ivi pipe

¹³ Evocoyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquia ve, ahe namombri Pisidia sui. Aheve, mbituhusa ari pipe, yuviroique judío t̄uparove oguapi yuvinoi. ¹⁵ Oyeroqui pare T̄upa porocuita resendar cuachiar pipe, T̄upa ñehe mombehusar cuachiar pipe avei, t̄uparo pendar rerecuar omondo oñehe Pablo upe:

—Ore mu, perecese mbahe pemombehu vahe rã co ava monguer̄hi ãgua, pemombehumi yandeu c̄uritei —ehi.

¹⁶ Evocoyase Pablo op̄uha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío T̄upa mboeteisar, pesendu che ñehe —ehi—.

¹⁷ Israel iguar T̄upa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare op̄iratasa pipe vinosepa ahe ivi sui aracahe. ¹⁸ Ipare T̄upa oñemosañõ yande ramoi reco ai upe cuarenta araviter rupi, oguatase yuvireco ivi iporupir̄hisa rupi. ¹⁹ Ipare omocañi

ava eta Canaán p̄ipendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara. ²⁰ Ēgüe ehi cuatrocientos cincuenta araviter rupi yapo yuvireco —ehi.

“Ipare Tūpa ombou ava recocuer moingatusar oporocuai vaherã. Ipa vahe ipãhu pendar serer Samuel aracahe. Ahe Tūpa ñehe mombehutar avei. ²¹ Ahese yande ramoi eta oporandu yuvireco Tūpa upe mborerecuar guasu rese. Evocoiyase Tūpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico. ²² Ipare Tūpa v̄irocua imborerecuasa ichui; omondo David upe yande ramoi cuai ãgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboav̄iyera che porocuita’ ehi Tūpa. ²³ Ahe David suindar sui, Tūpa ombou Jesús Israel iguar p̄s̄iro ãgua. Aracaheve Tūpa omombehu co yande ramoi upe. ²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo ãgua’ ehi chupe. ²⁵ Juan omboav̄iye senimise ocuaita, aipo ehi ava upe imombehu: ‘Pep̄ihañemoñeta revo: co ité yande p̄s̄irora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ip̄itaquisã yora ãgua ipi sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa p̄s̄irosa resendar. ²⁷ Jerusalén pendar rerecuar avei ndoicuai evocoi Jesús Tūpa remimbou

secoise yuvireco. Iyavei ndosenducuai Tūpa ñehe mombehúsar cuachiar pīpe oyeróquise mbituhusa arí yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehúsar rembicuachiagüer pīpendar yuvireco. ²⁸ Yepe ndoyosui mbahe sembiapo rai yuca uca āgua yuvireco viña, ahe rumo oporandũño Pilato upe yuca uca āgua rese yuvireco” ehi. ²⁹ “Ichui omboaviyese opacatu icuachiapri pīpendar yuvireco, oviroyi uca curusu sui ñoti āgua yuvireco. ³⁰ Tūpa rumo ombogüerayevi iri. ³¹ Setá arí rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūritei ahe ava ité omombehu Jesús recocuer ava upe yuvireco” ehi tūparo pendar upe.

³² “Sese che mu eta, cūritei oromombehu pēu evocoi ñehesa aviye vahe Tūpa omondo vahe yande ramoi upe aracahe. ³³ Tūpa omboaviye ramo güemimombehugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pīpe aipo ehi: ‘Co pīpe nde che Rahír ereico; che nde Ru aico’ ehi Tūpa chupe. ³⁴ Tūpa omombehu avei güemimbogüerayevi sete tuyuēhi āgua icuachiapri pīpe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye āgua’ ehi. ³⁵ Sese omombehu avei ambuae icuachiapri pīpe: ‘Nde, Tūpa, ndereseyai chira nde rembiguai Ava seco maranehi vahe rete ituyupa āgua’ ehi. ³⁶ Supi eté, David omboaviye ocuaita ava rese ohañecosa pīpe yepi.

Ipare omano. Evocoyase oyapocatu tuvipave imu pãhuve yuvireco. Ahe setecuer rumo opaño ité ituyu” ehi. ³⁷ “Acoi Tũpa ombogüerayevi vahe retecuer rumo ndituyui eté” ehi tũparo pendar upe imombehu. ³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pẽu. Moisés porocuita sui ndipoi ñeroisa angaipa rese yande reco mohivi ãgua. ³⁹ Jesús recocuer sui rumo oime ñeroisa ñepeipei viroya vahe upe” ehi. ⁴⁰ “Peicua catu co mbahe sui, tovıapi eme pe harıve acoi Tũpa ñehe mombehusar rembicuachi-agüer pipe aipo ehi vahe:

⁴¹ ‘Esepia, pe seroĩrosar peico vahe. Peyepıhamondi, ipare pecañi tẽira. Esepia, che ayapora mbahe pe recoveseve. Yepe ambuae omombehu tuprı itera pẽu che rembiaporã viña, pe rumo ndaperoyai chietera’ ehi Tũpa” ehi Pablo tũparo pendar upe.

⁴² Yuvınose potase tũparo sui, omombita Pablo yuvireco: “Teremombehu irimi eremombehu vahe ñehesa ambuae mbıtuhusa arı pipe oreu” ehi yuvireco chupe. ⁴³ Yuvınosese ava rehıi tũparo sui, setami judıo iyavei ambuae oyembojudıo vahe yuvıraso Pablo, Bernabé rupi yuvireco. Ahese, “Peico tuprı catu Tũpa pe rovasasa pipe” ehi ava upe yuvireco.

⁴⁴ Ambuae mbıtuhusa arı pipe seni opacatu ava ahe pendar oñemonuha yuvireco Tũpa Ñhengagüer rendu ãgua. ⁴⁵ Osepıase ava rehıi, judıo rereciar oñemoiró iteanga Pablo upe, supindar upe avei yuvireco. Viroıro Pablo ñehe ava upe yuvireco.

⁴⁶ Evocoyase Pablo, Bernabé reseve oñehe yuvireco judío upe osiquiyeeñisave:

—Tũpa ore cuai pẽu rane ore ñehe ãgua. Pe rumo ndapeyapisaca potai ñehengagüer rese. Ipipe sui ndiyai peipisi tecovesa apirẽhi vahe. Evocoyase orosora, oroñehe ava ndahei vahe judío upe. ⁴⁷ Esepia, yande Yar ombou ore cuaitarã co ñehesa rese aracahendar aipo ehi vahe:

‘Che oroporavo tataendi nungar nde reco ãgua ndahei vahe judío yuvirecoi vahe upe pĩsirosa reroguata ãgua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tũpa Ñehengagüer. Opacatu ava iporavopri tecovesa apirẽhi vahe pisi ãgua, ahe viroya yuvireco. ⁴⁹ Evocoyase Tũpa Ñehengagüer omombehu opacatu ahe ivi rupi yuvireco. ⁵⁰ Judío rumo omonguerẽhi cuña imboyeroyapri Tũpa mboeteisar iyavei mbia seco ivate vahe Pablo, Bernabé mose uca ãgua güecua sui yuvireco yamotarẽhisave. ⁵¹ Ahese Pablo, Bernabé oipipete opitaqui ivi sui yuvireco ‘Tũpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espiritu Santo oyese yuvireco.

14

Pablo, Bernabé reseve omombehu Tũpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tũparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío. ² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. ³ Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tũpa ombou opĩratasa mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombehuse’ oyapave. ⁴ Ahe tecua pendar rumo ipihañemoñeta yoviví yuvireco: ñepi judío pihañemoñetasa rupindar; ambuae evocoyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia uguapi oĩ ⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tũpa rese ocuera āgua. ¹⁰ Evocoyase aipo ehi pĩrata chupe:

—¡Epũha! —ehi.

Ahese opo, opūha, oguata voi. ¹¹ Osepiase ava rehi mbahe sembiapo yuvireco, osapucai pĩrata Licaonia ñehe piƣe yuvireco:

—Tũpa ité ava nungar ogüeyi yuvireco yandeu!
—ehi yuvireco Pablo, Bernabé upe viña.

¹² Ipihañemoñeta yuvireco Bernabé ahe tũpa Zeus iyavei Pablo ahe tũpa Hermes viña. Esepia, Pablo oñehe vahe. ¹³ Ahese co tũpa Zeus pahi güeru tivi, mbahe potri avei. Ahe tecua tapia roquendave, ahe Zeus tũparo tecua piƣe ava reiquesa rupi chini. Oyuca pota tivi Pablo, Bernabé mboetei āgua yuvireco viña. ¹⁴ Oicuae rumo Bernabé, Pablo, ahese omondo oturucuar yuvinoña ava pāhuve; oñehe pĩrata yuvireco:

¹⁵ —Mbia, ¿mahera ēgüe peye oreu? —ehi—. Ore rumo ava tēi pe nungar avei oroico. Oromobehu: “Pepoi co mbahe ēgüe ehi tēi vahe mboeteisa sui; peroya Tũpa supi eté vahe” orohe pēu. Ahe oyapo vahe iva, ivi, para guasu, opacatu ipor reseve. ¹⁶ Aracahe rumo Tũpa, “Ēgüe tehi oguata ndahei vahe judío opihañemoñetasa rupi yuvireco” ehi viña. ¹⁷ Tũpa rumo ndasesarai ava upe mbahe tupri apo āgua sui. Ahe ombou amar pēu mbahe miti ha aviye āgua yepi. Ēgüe ehi mbahe tembihu imbou iyavei viharetesa pēu —ehi ava upe yuvireco.

¹⁸ Yepe aipo omobehu yuvireco chupe, ava rehi rumo seniño ité tivi oyuca yuvireco chupe imboetei āgua viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rerova ava rehi yuvireco. Ichui oyapi-yapi ita piƣe Pablo

yuvireco. Ipare ombotiriri seraso yuvireco tecua ivi. Ipihañemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinose oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Lистра rupi, Iconio rupi avei, oyepota Antioquía ve yuvireco. ²² Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar upe. ²³ Ipare oiporavo ava Jesús reroyasar rāro āgua ñepeipei ñemonuhasa rupi. Oyeroqui iyavei oyecuacu. Ipare viropovēhe yande Yar upe iporaviqui āgua yuvireco.

Pablo, Bernabé oyevi yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese. ²⁵ Omombehu Tūpa Ñehengagüer yuvireco Perge ve. Ipare yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo āgua. Aheve tupri avei imboaviye pare oyevi yuvireco. ²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande

Yar ombou avei ava ndahei vahe judío upe Guahir reroya ãgua yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoiyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tüpa oyocuai Moisés yande ramoi cuai ãgua: ‘Pembocircuncida opacatu pe mu cuimbahe cheu nara’ ehi Tüpa aracahe” ehi yuvireco. “Cüritei acoi ãgüe ndapeyeise Jesús reroyasar upe, noñepisiroi chietera yuvireco” ehi Antioquía pendar upe yuvireco. ² Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu ãgua yuvireco.

³ Ëgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehumbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tüpa rupi oguata ãgua yuvireco” ehi. Ahese opacatu Jesús reroyasar oyemboviharete yuvireco senduse.

⁴ Yuviroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipisi tupri yuvireco. Aheve

omombehu Tūpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opūha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye āgua yuvireco —ehiño ité yuvireco.

⁶ Ahese apóstol, Jesús reroyasar rārosar avei oñemonuha oyemomborandu āgua aipo mbahe rese yuvireco. ⁷ Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropĩsirosa resendar mombehu āgua ava ndahei vahe judío upe ‘toviroya yuvireco’ oyapave. ⁸ Tūpa oicua ité opacatu ava pihañemoñetasa. Chupe avei omondo Espíritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—. ⁹ Evocoyase, “Judío aviye catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipihañemoñeta rai sui oyese yeroyasa pipe. ¹⁰ ¡Pe tie pesecoāha pota Tūpa! ¡Mahera peyocuai uca pota co Jesús reroyasar mbahe yavai rai vahe apo āgua! Aní rumo. Esepia, yande ramoi ndoicatu Tūpa porocuita mboaviye āgua yuvireco, yande avei ěgüe yahe —ehi—. ¹¹ Co rumo, yaroyase yande Yar Jesucristo, yande pĩsirora oporoaisusa pipe, inungar co ava ndahei vahe judío yuvirecoi —ehi Pedro.

12 Evocoiyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoiyase omombehu ndayasepiai vahe poromondiisa Tūpa oyapo uca ava ndahei vahe judío pāhuve yuvireco chupe. 13 Osendupase ñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: 14 Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—. 15 Oyoya tupri Tūpa ñehe mombehusar rembicuachiagüer rese. Ñepeipāhu pendar oicuachía aracahe aipo ehi:

16 ‘Coiye catu ayevíra vitu. Ahese ayapo piásu irira che rēta David oyapo uca vahecuer, ahe oi imocañipirer. Ambopiásu irira oitipa vahecuer yuvireco.

17 Ëgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

18 Evocoi yande Yar rembiaporã icuapri aracahe suive’ ehi Tūpa ñehe mombehusar aracahe.

19 “Sese chepihañemoñeta iya ndayayocuai chira Moisés porocuita rupi oñecuñaro vaherã ndahei vahe judío Tūpa rupi oguata ãgua yuvireco” ehi. 20 “Aviye rumo yaicuachiase chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi. 21 “Esepia, opacatu tecua rupi yuvirecoi

ava omombehu vahe Moisés porocuita ñepeipei mbituhusa ari pipe judío tũparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco. ²³ Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei.

²⁴ Oroyandu amove ava ore pãhu pendar pe mañeco tẽi aipo oporombohesa pipe yuvireco. Ahe ava ndahei ore ocuaita pipe yuviraso pẽu pe pihañemoñeta rerova. ²⁵ Sese oyoya orepihãñemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pẽu.

²⁶ Ahe acoi oyemondo vahe mbahe mbahe tẽi povrive yande Yar Jesucristo recocuer rese yuvireco. ²⁷ Oromondo Judas, Silas avei pẽu: ahe teieté omombehura opacatu cuachiar pipendar pẽu yuvireco.

²⁸ Aviye Espiritu Santo upe, oreu avei co porocuita gũeraño oromondo vahe rese pẽu. Ndape cuaisa pota iri rumo ambuae mborocuita rese.

²⁹ Pehui rene mbahe mimba yucapri seropovẽhepri mbahe rahanga tẽi upendar, ndapehui chiaveira mbahe ruvi, mbahe mimba yucapri suvi renosepirẽhi vahe

iyavei ndapeaguasai chira. Pepoise evocoi mbahe naporai vahe sui, oimera mbahe tupri pëu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. ³¹ Ahe cuachiar rese oyerouquise, oyemboviharere yuvireco. ³² Judas, Silas Tūpa suindar ñehesa mombehusar avei yuvirecoi. Sese omboviharere catu iyavei omonguerēhi catu avei ahe ava yuvireco oñehe pipe. ³³ Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe. ³⁴ Silas rumo opita potaño ité aheve. ³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pñha ahe yuvireco? —ehi.

³⁷ Ahese Bernabé viraso pota Juan Marcos oyeupi viña. ³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipitiviño iporaviquisa rese” ndehi chupe. ³⁹ Nomoingatuisse mbahe oyeupe yuvireco, oyepipiño yuvireco oyesui. Ahese Bernabé viraso Marcos oyeupi carite pipe Chipre ve.

40 Pablo rumo oiporavo Silas oyeupi icho ãgua. Yuvínose ãgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pĩpe” ehi yuvireco imondo. 41 Ipare yuviraso Siria, Cilicia rupi Jesús reroyasar monguerẽhi catu ãgua yuvireco.

16

Timoteo oso Silas ndugüerã Pablo rupi

1 Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego. 2 “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe. 3 Pablo viroguata potaño ité Timoteo oyeupi. Sese seroguata renondeve, ombocircuncida uca seroĩroẽhi ãgua judío yuvirecoi vahe upe. Esepia, opacatu oicua Timoteo ru griego secose yuvireco. 4 Evocoiyase opacatu tecua iguatagüer rupi omombehu ahe mborocuaite apóstol, Jesús reroyasar rãrosar Jerusalén pendar ombou vahe yuvireco chupe. 5 Sese Jesús reroyasar ahe tecua rupindar oyemoviracua catu yuvireco Jesús reroyasa pĩpe iyavei oyemboeta catu yuvireco arĩ rupi.

Tũpa omondo uca Pablo Macedonia ve iquer nungar pĩpe

6 Espíritu Santo ndoipotai Asia rupi yuviraso vaheerã Tũpa Ñehengagüer mombehu ãgua. Sese oyahuva yuviraso Frigia rupi, Galacia rupi avei. 7 Êgüe ehi oyepota Misia popĩve yuvireco. Ichui

yuviraso pota tēi Bitinia ve. Jesús Espíritu rumo ndoipotai icho ãgua supí. ⁸ Ahese osasaviño yuviraso Misia sui carite guasu yemboyasa Troas ve oyepota ãgua yuvireco. ⁹ Oyepotase aheve, ahe pĩtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pĩtivii ãgua viña” ehi ohã chupe. ¹⁰ Ipare ore oroyemoingatu voi eté Macedonia ve ore so ãgua. Esepia, ore oroicua ité Tũpa aheve ore mondora ñehesa pĩsirosa resendar mombehu ãgua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico. ¹³ Mbituhusa ari pipe orosē evocoi tecua sui iai popive. “Aheve oñemonuhara judío oyeroqui ãgua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pĩsirosa resendar yuvireco chupe. ¹⁴ Ñepeĩ imboetasa, Lidia serer vahe, Tiatira pendar, oyapisaca ore ñehe rese oĩ. Ahe Tũpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca ãgua Pablo remimombehu rese. ¹⁵ Sese ñapiramosa, opacatu sēta pendar reseve. Ipare ore mombita pota güētave.

—Che reroyase peye yande Yar reroyasar che recose, pepitara che rêtave —ehi oreu.

Ëgüe ehi ore monguerëhi. Sese oropita sêtave ipiri.

¹⁶ Ipare ambuae ari oroso irise oroyeroqui ãgua, cuñatai ore rovaïchi, ahe cuñatai caruguar pĩratasa pipe mbahe mombehusar. Oicatu ava upe mbahe oime vahe rã mombehu. Omombehuse mbahe, setã oipisi sepri guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tũpa ivate catu vahe upendar oporaviqui yuvireco omombehu: “Na ehira Tũpa yande pĩsiro” ehi yuvireco! —ehi pucu-pucu ore mombehu ava upe.

¹⁸ Setã ari ëgüe ehi oico oreu. Omañeco tẽise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipe: esẽ co cuñatai sui —ehi.

Aheseve voi caruguar osẽ ichui.

¹⁹ Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco.

²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tẽi yuvirecoi. Ayeve omboavü guasu tẽi yuvireco yande recua pipe. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña ãgua —ehi yuvireco mborerecuar upe.

²² Evocoiyase ava eta oyamotarēhi Pablo iyavei Silas yuvireco iyavei mborererecuar, “Pesequi iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pĩrata soquendapri rãrosar yuvireco, “Esãro tupri” ehi yuvireco chupe. ²⁴ Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pĩtu mbiter rupi rumo Pablo, Silas oyerogui, osapucái Tũpa mboeteisave yuvireco. Ambuae ava soquendapri evocoiyase osenduño tēi yuvireco isapucái. ²⁶ Ahese aviyeteramo tēi ivi orirĩ eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rãrosar omahe yesapiha. Osepiase oquenda imboipri, ahese vinose oquise pucu siru sui oyeyuca ãgua viña. Esepia niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tēi ndeyeupe! ¡Esepia, opacatu oroicoveño cohave! —ehi pucu soquendapri rãrosar upe.

²⁹ Evocoiyase soquendapri rãrosar, “Emboumi tataendi” ehi ondugüer upe. Ichui oña oique, orirĩ, osiquiyepave oñenopiha Pablo, Silas rovai oso. ³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro ãgua vichico? —ehi chupe.

³¹ —Eroya yande Yar Jesucristo. Ichui ahe nde pĩsirora, nde rēta pendar avei —ehi yuvireco chupe.

³² Ahese omombehu yuvireco Tūpa Ñehengagüer soquendapri rãrosar upe, opacatu sēta pendar upe avei. ³³ Ahe pĩtu pipeve avei soquendapri rãrosar viraso oyeupĩ, yapichasa oyoseipa chupe. Ahese Pablo, Silas oñapiramo guãrosarer, sēta pendar avei yuvireco. ³⁴ Viraso pare sãrosar güētave, ombocarú. Ahe sēta pendar avei oviharete ité yuvireco Tūpa reroyasa rese.

³⁵ Cõhese mborerecuareta omondo sundao ava rese icuaipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. ³⁶ Ahese soquendapri rãrosar omombehu co ñehesa Pablo upe:

—Mborerecuar ombou yuvireco ñehesa cheu pe mose água. Peso tupriño peico —ehi chupe.

³⁷ Omboyeví rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose água —ehi soquendapri rãrosar upe.

³⁸ Ipare sundao ava rese icuaipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero água rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia

rētave. Oñemonuha irise ambuae Jesús reroyasar pãhuve, omonguerẽhi catu yuvireco. Ipare yuvirasó ichui.

17

Ava yaïvu guasu tẽi Tesalónica ve yuvireco

¹ Oguatase Pablo iyavei Silas, oñocua Anfípõlis iyavei Apolonia rupi yuvirasó. Êgüe ehi oye-pota tecua Tesalónica ve yuvireco. Aheve oime judío tũparo. ² Secocuer rupi eté mbituhusa ari pipe Pablo oi que judío tũparove, oñemoñeta ava eta upe mbosapĩ mbituhusa ari rupi Tũpa Ñehengagüer rese. ³ Omboyecua tupri imombehu Tũpa Rembiporavo ava pĩsiro ãgua iparaisu rane itera, omanora, ipare rumo ocuerayevĩ iriño itera. Ipare aipo ehi:

—Jesús, acoi amombehu vahe pẽu, ahe ité niha Tũpa Rembiporavo ava pĩsiro ãgua —ehi.

⁴ Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tũpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoirombave secatẽhi ava rese yuvireco. Sese omonuha ava yuvireco tẽi vahe, ndipihai vahe yuvireco. Imonuha pare, ahe omboaïvu guasu uca tẽi ahe ava upe opacatu güecua pipe yuvireco. Yuvirasó Jasón rêtave Pablo, Silas reca, vinose pota ava rehii pãhuve yuvireco viña. ⁶ Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrítei oyepotapa yuvireco cohave! ⁷ Co Jasón omombituhu güētave. ¡Opacatu co yuvirecoi vahe ndoviroyai Cesar porocuaíta yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pïpendar yuvireco. ⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tüpa Ñehengagüer Berea ve yuvireco

¹⁰ Ahe pïtu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tüparo pipe. ¹¹ Berea pendar ava aviye catu ava Tesalónica pendar sui. Ëgüe ehi ipisi ohãpisiẽhisa pipe ñehesa yuvireco iyavei ari yacatu rupi oseca Tüpa Ñehengagüer pipe ‘¿supi eté pïha Pablo ñehesa?’ oyapave yuvireco. ¹² Evocoiyase setá avei Pablo ñehe reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tüpa Ñehengagüer rese Berea ve. Sese yuviraso aheve imboavü guasu tẽi uca água ava upe yuvireco. ¹⁴ Evocoiyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opïta viteño aheve

yuvireco. ¹⁵ Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehe Silas upe iyavei Timoteo upe avei yuvireco yuviraso voi ñgua Pablo piri ahe tecuave yuvireco.

Pablo Atenas ve secoi

¹⁶ Pablo osãro viteseva Silas iyavei Timoteo Atenas ve oico, ndoyembovihal osepia se opacatu rupi tũpa rahanga-anga tẽi. ¹⁷ Sese judío tũparo pipe omombehu Jesús recocuer judío eta upe iyavei ambuae Tũpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe. ¹⁸ Evocoyase amove mbia oyembohe vahe epicúreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pĩha co mbia iñehe papa rai ava upe oico? —ehi.

Ambuae aipo ehi yuvireco:

—Ndoyavi co mbia oñehe vahe ambuae ava Tũpa rese tẽi —ehi yuvireco.

Esepia, omombehu Jesús recocuer iyavei cuerayevisa resendar. ¹⁹ Evocoyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? ²⁰ Supi eté niha erombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

21 Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

22-23 Evocoiyase Pablo opūha ahe ava pāhuve aipo ehi:

“Pesendu rane Atenas iguar. Aguatase ocar rupi asepia pe tūpa eta pemboetei vahe. Ahese asepia ñepepe tūpa upe seropovēhepri renda. Sese asepia icuachiapri aipo ehi oī: ‘Tūpa ndicuasai vahe upendar’ ehi. Evocoi Tūpa ndapeicua vitei vahe, ahe secocuer niha amombehu pēu” ehi.

24 “Evocoi Tūpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tūparo ava tēi rembiapo pipe. 25 Ndahei ava rembiapo pipe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe ivi, ivave” ehi.

26 “Tūpa oyapo opacatu-catu tēi ava ñepepe ava sui ava yesu āgua opacatu ivi rupi. Omondo ivi ava yemboerecua āgua ñepepepe upe. Ari avei omondo co ivi pipe iyemboerecua āgua yuvireco chupe. 27 Ēgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ēgüe ehi rumo Tūpa yande resevemi eté. 28 Esepia niha, Tūpa sui yaicove, ipīratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco. 29 Sese yande Tūpa suindar yaicose,

‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi. ³⁰ “Pe ramoi ndoicua tupriise yuvireco aracahe, Tūpa oñemosañō mbahe sembiapo rese chupe. Cūritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya. ³¹ Esepia, ahe oiporavo ari opacatu ava recocuer rese porandu uca āgua güecocuer ivi tuprisa pipe ñepe güembiporavo upe. Ahe ombogüerayevi güembiporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

³² Osenduse yuvireco cuerayevisa resendar, ahesese oime ava oyoyai catu yuvireco seroñrosave. Ambuae rumo aipo ehi yuvireco:

—Tososendu irimi aipo ñehesa curi —ehi yuvireco.

³³ Sese Pablo osē ipāhu sui oso. ³⁴ Moviro rumo mbia oyemboya sese, viroya ité vahe iñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osē Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco

Priscila reseve. Yuvĩnose ñepei tecua Italia rupindar Roma sui oyocuaise mborerecuar guasu Claudio: “Toyuvĩnose ité opacatu judío Roma sui” ehise. Pablo oso, ³ opĩta Aquila pĩri oporavĩqui ãgua. Esepia, Pablo, Aquila avei ahe mbahe pĩrer mbovĩvisar pãve yuvĩrecoi. ⁴ Mbituhusa arĩ yacatu rupi Pablo omombehu Jesucristo recocuer ava upe judío tũparo pĩpe ‘tovĩroya Jesús judío iyavei ndahei vahe judío yuvĩreco’ oyapave.

⁵ Oyepotare rumo Silas, Timoteo Macedonia sui yuvĩreco, ahese Pablo oyemondo ité Jesús recocuer mombehu ãgua rese güeraño judío eta upe aipo ehi: “Jesús niha Tũpa Rembiporavo ava pĩsiro ãgua secoi” ehi. ⁶ Iñehe-ñehe tẽi rumo seroĩrosave yuvĩreco chupe. Sese Pablo oipĩpete oturucuar sovaque ‘oimera mbahe tẽi pẽu’ oya, iyavei aipo ehi chupe yuvĩreco:

—Pe ae niha peseca Tũpa ñemoĩrosa peyeupe pe recocuerai sui. Ndahei rumo che resera mbahe. Esepia, che amboavĩye tuprĩ che cuaita pẽu. Che rumo, co pĩpe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osẽ judío tũparo sui, oique mbia Ticio Justo serer vahe rõtave, ahe Tũpa mboeteisar avei secoi. Ahe sẽta judío tũparo iqueve. ⁸ Crispo, ahe judío tũparo rerecuar vĩroya avei yande Yar, opacatu sẽta pendar avei vĩroya yuvĩreco. Setá ambuae Corinto pendar avei vĩroya osenduse iñehesa yuvĩreco. Seroya pare, oñeapiramopa uca yuvĩreco. ⁹ Ñepei pĩtu pĩpe yande Yar oñehe Pablo upe iquer nungarve: “Eresiquiyei

rene, ereñehe ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua pîpe” ehi yande Yar chupe. ¹¹ Evocoyase opita ñepei araviter yemombitesa rupi Corinto ve oico. Aheve ombohe Tũpa Ñehengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarêhisave. Ichui viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tẽi ava oTũpa mboetei ãgua. Ndahei rumo Roma pendar porocuaita rupi êgüe ehi yuvireco —ehi yuvireco seroïrosave chupe.

¹⁴ Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerẽhira che yapisaca ãgua pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tũpa rer resendar iyavei pe Tũpa porocuaita resendar rese tẽi. Pemoingatu pe ae pe recocuer; ndaipotai aipo nungar mbahe moingatu ãgua —ehi Galión ahe ava upe.

¹⁶ Ipare opa omboyepipi porandusa sui. ¹⁷ Ahese opacatu griego oipisi judío tũparo rerecuar Sóstenes yuvireco. Ipare yuvirocuarocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yeví irisa Antioquía ve

¹⁸ Pablo secoi pucu vîte pare Corinto ve, “Asora vichico cute” ehi Jesús reroyasar upe. Ipare yuvíraso Aquila, Priscila reseve. Oyepotase Cencrea ve yuvíreco para guasu popíve, aheve Pablo oñeapipa tuprí oñehe mboaviye ãgua. Ipare yuvíraso carite pípe Siria ve. ¹⁹ Siria piar rupi yuvíraso Efeso ve. Aheve opíta Aquila, Priscila yuvíreco. Ichui Pablo oi que judío tũparo pípe Jesús resendar ñehesa mombehu ãgua chupe yuvíreco. ²⁰ Ahe pendar omombíta pota vîte tẽi yuvíreco viña, Pablo rumo ndopíta potai aheve. ²¹ Evocoyase, “Avíye, taso rane” ehiño chupe yuvíreco. “Tũpa oipotase cheu, ayeví irira vitu pe píri” ehi.

Ipare oso Efeso sui carite pípe. ²² Oyepotase Cesarea ve, oso Jerusalén ve “avirave” apo ãgua Jesús reroyasar upe. Ipare oso Antioquía ve. ²³ Opíta pucu pare aheve, osẽ, oguata iri Galacia rupi, Frigia rupi opacatu Jesús reroyasar monguerẽhi catu ãgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tuprí ai vahe, oicua tuprí avei Tũpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerẽhisa pípe secocuer ava upe, oporombohe tuprí ai avei sese. Ahe rumo oicua Juan oãpiramo agüer güeraño tẽi. ²⁶ Ahe osiquíyeẽhisave judío tũparo pípe omombehu Tũpa Ñehengagüer. Osenduse Aquila, Priscila iñehesa, omombíta yuvíreco oyepíri. Ahese omombehu

tupri catu Tũpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerẽhi catu. Oyapo cuachiar Acaya pendar upe imondo yuvireco sese hañeco tupri ãgua. Ipare oyepota oso Acaya ve. Aheve oime ava Tũpa guaisusa pipe sui viroya vahe Jesús yuvireco. Ahe ava Apolos oipĩtĩvĩ seroya tupri catu ãgua yuvireco. ²⁸ Omboyecua opacatu rovaque judío pihañemoñetasa co coti tẽi vahe. Ahese opa osecopi oñehe pipe ahe ava. Esepia, Tũpa Ñehengagũer pipe omboyecua ite: “Jesús Tũpa Rembiporavo ava pĩsĩro ãgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. ² Evocoyase oporandu ahe ava upe:

—¿Peipisi vo Espĩritu Santo pe piha pipe peroyase Jesús? —ehi chupe.

—Ore ndorosendui eté aipo Espĩritu Santo re-sendar ñehesa —ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oan-gaipa oyevisẽ Tũpa upe. Ipare rumo omombehu

ava upe: “Peroya ahe eté vahe ou vaherã che raquicuei” ehi. Ahe ou vaherã, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyi Espíritu Santo, oique ipiha pipe yuvireco. Ipare aviyeteramo tẽi oñehe ambuae ñehesa pipe iyavei omombehu Tũpa suindar ñehesa yuvireco. ⁷ Ëgüe ehi Tũpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tũpa Ñehengagüer judío upe osiquiyeẽhisave itũparo pipe ipihañemoñeta rerova ãgua Tũpa mborerecuasa resendar reroya ãgua rese. ⁹ Amove rumo judío ipihavĩracua ité seroyaẽhi ãgua yuvireco. Ipipe iñehe-ñehe tẽiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. ¹⁰ Ëgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tũpa omondo güeco pĩratasa Pablo upe poromondiisa apo ãgua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera ãgua. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose ãgua ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi carugar upe: “Pablo Jesús recouer omombehu vahe rer pipe, ‘Peyepipi co mbia sui’ ahe pëu” ehi. Ëgüe ehi pota avei siete Esceva rahir mbahe apo yuvireco viña. Ahe iyésupa judío pahi rereciar seci. ¹⁵ Carugar rumo omboyevi chupe: “Che aicua Jesús recouer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

¹⁶ Aheseve ahe cuimbahe carugar vireco vahe opo ipãhuve oso. Opacatu opĩratasa pipe opa ité osecopi siete mbia yuvirecoi vahe. Omomarama tēi oguayĩehisa pipe imonanza tupri imondo. ¹⁷ Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa re-sendar sapi ãgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepi cincuenta mil tupri ari mboraviqui repri. ²⁰ Ëgüe ehi Tũpa opĩratasa pipe ombouvicha oñhengagüer iyavei iñehe pĩratasa oyecua catu ava rese.

²¹ Ipare Pablo ipihañemoñeta Jerusalén ve oso ãgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi.

²² Evocoyase omondo ñuvirío opĩtivisar Timoteo,

Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pipe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secoi. Ahe oyapo Artemisa rēta rahanga guarepochi apopri guarepochi pisi āgua. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiyu guasu uca āgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tūpa ité’ ohesa pipe yande rembiapo uve. Ndahei rumo cohapeño ēgüe ehi, opacatu Asia rupi ēgüe ehi avei imombehu. ²⁷ Aviyeteramo mbahe tēi oimera yandeu yande poraviquisa mocañi tēi āgua, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroïrora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoïrosa pipe virosapucai aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tēi. Osapucaí vahe oipísi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipísise, omombo-mombo seraso yuvireco ava ñemonuha guasusave. ³⁰ Pablo oique pota tēi ava rehí pãhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucaí pĩrata ñepeí mbahe rese, amove osapucaí ambuae mbahe rese. Esepia, yaivu tēi yuvireco. “¿Mahera vo evocoyase yañemonuha?” ehi tēi setá ipãhu pendar yuvireco. ³³ Amove rumo ava rehí pãhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu ãgua ava rehí rovaque yuvireco. Alejandro evocoyase omopuha tēi opo ava monguiriri ãgua viña. Osepí pota omu judío ava rehí rovaque viña. ³⁴ Ava rehí rumo oicuase Alejandro judío secose yuvireco. Opacatu guasu osapucaí pĩrata yuvireco. “¡Imboetepri catu Artemisa yande recua pendar tasecoi!” ehi pucupucu yuvireco. Ëgüe ehi ahe osapucaí ñuvirío hora rupi rutei yuvireco.

³⁵ Evocoyase tecua pĩpendar mbahe cuachiasar oicatusé ava monguiriri ãgua, aipo ehi chupe: “Peyapísaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga iva sui ovíapi vahe rese avei hañecosa. ³⁶ Ndipoi niha ava, ‘Aní’ ehi vaheerã che remimombehu rese. Sese

peyemonguiririño, peyapoi rene mbahe pe yapisacaẽhisave. ³⁷ Peruño tẽi eté co ñuvirío mbia cohave, ndoyapoi rumo mbahe tẽi Artemisa upe yuvireco. Nimondai mbahe rese itũparove, ndoviroĩroi avei serer yuvireco. ³⁸ Sese Demetrio iyavei oporaviqui vahe supi ahe oñemoĩrose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu ãgua. ⁴⁰ Mborerecuar revo oyandura yande rembiapo co pipe, ‘¿Mahera peavũ guasu tẽi? ¿Che amotarẽhimbave tie ãgüe peye?’ ehi tiẽtera yandeu. Oporanduse yandeu, ndayaicatui chitiẽtera imboyevi ãgua iñehe chupe. Esepia niha, co yañemonuha yande remimbotar tẽi cohave” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivũ guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omonguerẽhi-rẽhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyevi iri oso Macedonia ve ivi rupi. ⁴ Yuviraso moviro mbia supi, ipãhuve ñepeĩ Berea pendar,

Pirro rahır Sópater; ñuvırío Tesalónica pendar, Aristarco, Segundo; ñepeı Derbe pendar, Gayo; ñuvırío Asia pendar, Tíquico, Trófimo. Timoteo oso aveı supı. ⁵ Evocoi mbıa yuvıraso Pablo renondeve sãro ãgua Troas ve. ⁶ Pieta pan ndayapepoi vahe hu pare, orosẽ tecua Filipo sui carite pıpe, cinco arı rupı oroyepota Troas ve. Ahe tecuave oropıta siete arı rupı.

Pablo Troas ve secoi

⁷ Domingu pıpe, ore oroñemonuha pan hu ãgua. Ahese Pablo oporombohe oico pıtu mbıter rupı. Esepia, ahe osẽ pota ahere ayihive voi ichui. ⁸ Ahe oi ivate vahesave ñemonuhasa pıpe setá tataendi. ⁹ Mbıa chıhivahe, Eutico serer vahe, metanave oguapı oı. Pablo rumo oñehe pucú iteanga. Evocoyase omboopesıı ahe chıhivahe. İpare oqué; avıyeteramo tẽi ovıapi oi ivate vahe mbosapısa sui. Ahese ava ogüeyı sehögüer rupı ivı sui yuvıreco. ¹⁰ Evocoyase Pablo ogüeyı ou chupe, oñeno oso sese icuhaguã. İpare aipo ehi Jesús reroyasar upe: —Pesıquıyeı rene; nomanoi moco —ehı.

¹¹ İpare oyeupi iri oso ombohi pan igua. Ichui oñehe pucu vıte. Omomba cõhe senise; ipare oso cute. ¹² Evocoyase co mbıa chıhivahe vıroyevıse secosave, opacatu oyembovıha guasu catu yuvıreco. Esepia, nomanoi eté.

Pablo yuvıraso Troas sui Mileto ve

¹³ Pablo oso pota ivı rupı, ore ranengatu rumo oroso carite pıpe Aso ve. Aheve oroyepota Pablo reraso ãgua semimbotar rupı. ¹⁴ Oroyoepıase aheve, oha carite pıpe ore pıri. Ichui oroso cute Mitilene ve. ¹⁵ Ahere ayihive carite pıpe oroñocua

Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco água. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya. ¹⁸ Oyepotase yuvireco chupe, aipo ehi: “Pecua niha che recocuer aviye ité yipisuive ari che reique ramosa resendar co Asia ve. ¹⁹ Ari yacatu rupi aporaviqui yande Yar upe pe pãhuve vichico che reco asiëhisave che yasehosa pipe. Yepe judío che mboguai etepri che recoãhasave pe recuave yuvireco viña, ²⁰ che rumo ndaicutui ñehesa aviye vahe mombehuëhi pëu mbahe aviye água yepi. Che opombohe ava rehii rovaque, opombohe avei ñepei-pei pe rëta rupi yepi” ehi. ²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tũpa upe, peroya avei yande Yar Jesús’ ahe” ehi. ²² “Cũritei asora Jerusalén ve vichico. Aheve che so água Espíritu che cuai che piha pipe. ‘¿Mara ehira piha yuvireco peve cheu?’ aipo ahe. ²³ Co güeraño che aicua: opacatu tecua che sosa rupi Espíritu Santo aipo ehi cheu che roquenda água iyavei che mombaraisu água yuvireco yepi” ehi. ²⁴ “Ndacherecatëhii rumo cheyese che mano água. Che rumo amboaviye potaño ité che poraviquisa Tũpa upe, ahe yande Yar Jesucristo che cuai vahe co ñehesa icatupri vahe mombehu água. Co Tũpa

oporoaísusa p̄ipe ombou ñepeí vahe Guah̄ir ava p̄is̄iro ãgua” ehi.

²⁵ “Opa niha T̄upa mborerecuasa amombehu p̄eu. Che rumo aicua ndache repia iri chira peye. ²⁶ Sese tapeicua c̄uritei: ndayav̄i eté che cuaita mboav̄iye ãgua co tecocuer av̄iye vahe mombehu p̄ipe p̄eu. ²⁷ Esepia, ndaicuacui eté T̄upa Ñhengaḡuer mombehu; che rumo amombehuño ité opacatu T̄upa recocuer p̄eu. ²⁸ Sese peñearo tupri, pes̄aro avei opacatu Jesús reroyasar Esp̄iritu Santo porocuita rupi. Inungar ovesa r̄ãrosar, ãḡüe peye tuprira s̄ãro. Ahe T̄upa remimboepi yuv̄irecoi. Esepia, Jesús oip̄iyere vuv̄i opacatu ava angaipa rep̄irã. ²⁹ Aicua che opoeyare, oyuḡuerura ambuae ava mahembiar oñaro ai vahe nungar pe p̄ãhuve opacatu Jesús reroyasar mocañipa pota ãgua. ³⁰ Oime aveira que ava pe p̄ãhu pendar pe mbopa pota aveira yuv̄ireco pe reraso ãgua oyeupi. ³¹ Sese pemahemoha tupri peyese. Pema-henduha acoi opomboaracua tuprise mbosapi arav̄iter rupi, p̄ĩtu, ar̄i yacatu rupi avei che yase-hosa p̄ipe pe rereco” ehi.

³² “Sese, che riv̄ireta, opoeyara T̄upa pov̄rive iyavei ñehesa iporovasasa resendar p̄ipe. Ahe pe mov̄iracua catura pe rereco iyavei omboura opacatu mbahe güemimombehu p̄eu opacatu ambuae güembiporavo reseve. ³³ Ndaheí pe guarepochi, que oro iyavei pe turucuar pota raisa p̄ipe aso pe p̄ãhuve. ³⁴ Peicua niha acoi che po p̄ipe ité aporav̄iqui che recove ãgua, che rupindar recove ãgua avei. ³⁵ Ëḡüe ahe amboye-cua che recocuer p̄eu. Supi avei ãḡüe pey-

era; yaporaviqui tupri iparaisu vahe rese hañeco ãgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

³⁶ Oñehe pare, oñenopiha oyerure ãgua opacatu omboripar reseve. ³⁷⁻³⁸ Ndoyembovihal eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyacoyaco, osovaupite-pite iri tēi avei yuvireco saisupave. Ipare yuvirasoño ité yuvireco supi carite yemboyasave.

21

Pablo so agüer Jerusalén ve

¹ Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso vaheerã Fenicia ve, ahe ipipe oroha, oroso. ³ Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoẽhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua. ⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoyase eresoi rene Jerusalén ve” ehi yuvireco chupe viña, ⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve

oroñenopi hapa ore yerure ãgua. ⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güêtave.

⁷ Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepei ari. ⁸ Ahere ayihive oroso Cesarea ve. Aheve oroique, oropita Felipe rêta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pâhuve. ⁹ Evocoi Felipe vireco irungatu guayri ndomendai vahe. Tayri Tûpa ñehe mombehusar pâve yuvirecoi. ¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tûpa ñehe mombehusar secoi. ¹¹ Ouse ore pâhuve, virocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Erosoi rene Jerusalén ve” orohe tẽi chupe. ¹³ Omboyevi rumo oreu:

—¡Mahera peyaseho che rese, ndache mbovihal peye! Che rumo ayemoingatu voi che ãpichi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndroicatuise ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rêtave. Ahe ore moingue oyepiri. Ahe yipive ité viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisii ore pisi yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tũpa mbahe oyapo uca vahe avandahei vahe judío pãhu rupi. ²⁰ Osenduse, omboetei guasu Tũpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerẽhi vahe Moisés porocuaita aracahendar mboaviye ãgua yuvireco —ehi—. ²¹ Osendu tẽi nde rembiapo yuvireco. Omombehu tẽi avei aipo nde he yande mu ambuae tecua rupindar yuvirecoi vahe upe: “ ‘Peseya Moisés porocuaita. Pembocircuncida iri rene pe rahir. Peico iri rene yande recocuer aracahendar pipe’ aipo ehi tẽi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepia, oyandura nde yepotasa cohava yuvireco. ²³ Aviye catu ereyapora ore porocuaita oromombehu vahe ndeu. Oime irungatu mbia ore pãhuve. Ahe mbia

omboaviyera güemimombehu Tūpa upe yuvireco. ²⁴ Eraso co mbia ndeyeupi, eñemoatiro supi eso, emboepi avei mbahe Tūpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuaita, opacatu judío nde reroyara, oicua ara va semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuaita —ehi yuvireco chupe—. ²⁵ Ndoroyocuai rumo ara Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mimba yucapri suvi renosepirēhi vahe iyavei peaguasai rene” orohe chupe —ehi yuvireco.

Judío oipisi Pablo tūparo guasu pipe yuvireco

²⁶ Evocoiyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tūpa porocuaita rupi icuavēhepirā” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tūparo pipe yuvireco. Ahese omoñemoiro uca opacatu ara rehii tūparo pendar. Ipare ipisise, ²⁸ sāse yuvireco: “¡Ore mu, ore pītivi peye co mbia oroipisi vahe rese! Esepia, oguata opacatu rupi. Oñehe tēi yande rese, Moisés porocuaita rese, yande tūparo rese avei iyavei

viroique ava ndahei vahe judío yande tũparo pipe. Sese omonguiha tẽi yande tũparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tũparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cũriteimi ava yuvinoña guasu tũparove. Oipisi Pablo ombotiriri senose tũparo pipe sui yuvireco. Ahese omboya voi guaquicuei tũparo roquenda yuvireco. ³¹ Oyuca potase yuvireco, ahese yaivu rãracua oyepota sundao rerecuar guasu upe. ³² Cũriteimi serecuar viraso sundao, yuvinoña yaivu vahe upe yuviraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pẽu?” ehi judío eta upe. ³⁴ Ahese amove ava ñepeí mbahe rese oñehe, ambuae, ambuae mbahe rese tẽi yuvireco. Evocoyase sundao rerecuar ndoicatuí supí eté vahe mbahe rendu ãgua yaivu guasu vahe pãhuve. Sese, “Peraso cuartelve” ehi. ³⁵ Viroyepotase yeupisave, ichuí osupí sundao oachihive seraso yuvireco ava rehí ñemoiró iteangasa sui. ³⁶ Ava rehí rumo yuvirasoño ité saquicuei, “¡Tomanol!” ehi pucu-pucu yuvireco chupe.

Pablo oyoepi ava rehi rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoiyase, omboyevi mborerecuar chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pãve cuatro mil tupri ivi iporupirẽhisa rupi —ehi sundao rerecuar chupe.

³⁹ Evocoiyase,

—Che judío, tecua Tarso pendar aico. Ahe tecua Cilicia pipendar imboeteipri vahe secoi. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoiyase mborerecuar, “Aviye” ehi chupe. Ipare opũha yeupisa harive, omopuha opo ava eta monguiriri ãgua. Ahese oyapisaca tupri ava rehi yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi ãgua pẽu cũritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerquisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tũpa mboetei ãgua rese vichico inungar pe peico cũritei. ⁴ Che yipindar aseca-seca catu ava co Tecocuer Piasu

rupi oguata vahe yamotarēhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vahe rã yande mu tũparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi ãgua. Ichui tarupa cohava imombaraisu ãgua’ ahe viña.

Pablo omombehu oñecuñaro agüer

⁶ “Evocoyase aso Damasco ve. Ahe ipiar rupi arovise vicho mbit̃er ari rupi, aviyeteramo t̃ei osesape guasu ìva sui oreu. ⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. ⁸ Ahese aporandu: ‘¿Ava vo nde ereico, Mbĩa?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. ⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. ¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epũha, eso Damasco ve. Aheve ava opara omombehu mbahe nde rembiaporã’ ehi cheu. ¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbĩa, Ananías serer vahe, ou cheu. Ahe Tũpa mboyeroyasar ité, viroya tupri vahe avei iporocuita; sese opacatu judío secua pendar: ‘Co mbĩa aviye vahe ité’ ehi yuvireco chupe.

¹³ Oyepotase, aipo ehi: ‘Che rivri, Saulo, esareco

iri' ehi. Aheseve iporēhi iri mbahe cheu. ¹⁴ Ipare aipo ehi: 'Yande ramoi rembieroya, yande Ru Tūpa, nde poravo güemimbotar cua āgua. Oipota avei eresepia vaheṛā ichuindar ava seco ĩvi vahe, eresendu aveira ĩñehe' ehi. ¹⁵ 'Nde evocoyase eremombehura secocuer opacatu ava upe; eremombehura nde rembiepia, eresendu vahe avei' ehi cheu. ¹⁶ 'Evocoyase, cūritei ndiya iri eresāro' ehi. 'Epūha, toroāpiramo. Eporandu yande Yar upe nde reco moatiro āgua nde angaipa sui' ehi Ananías cheu.

“Tūpa che mondo ava ndahei vahe judío upe” ehi

Pablo

¹⁷ “Coiye catu, ayevi irise Jerusalén ve, ayerure tūparo guasu pīpe. Ahese che quer nungarve asepia mbahe. ¹⁸ Asepia yande Yar. Ahe aipo ehi cheu: 'Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar' ehi Jesús cheu. ¹⁹ Che aipo ahe chupe: 'Che Yar, opacatu che cua nde reroyasar roquenda-quendase, ainupanupa ucase avei aguatase judío tūparo yacatu rupi' ahe. ²⁰ Aipo ahe avei chupe: 'Oyucase Esteban yuvireco, ahe nde recocuer mombehutar, che ahese asepia. Chepihañemoñeta rupi aviyeño oyucase yuvireco. Sese asāro yucasar yeaosa vihā' ahe chupe. ²¹ Che Yar rumo omboyevi cheu: 'Eso, oromondora coi rupi ava ndahei vahe judío pāhuve' ehi che Yar cheu” ehi Pablo ava rehi upe.

Pablo sundao rereciar guasu povrīve secoi

²² Aipo rupi osendu ĩñehe yuvireco. Ahese rumo osapucāi pīrata yuvireco chupe: “¡Tomano co mbia!

¡Toicove vite iri eme co ivi pipe!” ehi yuvireco chupe. ²³ Osapuca-pucái, osequipa oyeaosa ofñemoirombave yuvireco iyavei omombo-mombo ivi cuhi ivate coti yuvireco yamotarēhimbave.

²⁴ Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse atí yamotarēhimbave ava yuvireco chupe” ehi osundao upe. ²⁵ Oñapichise rumo inupa ãgua yuvireco, Pablo omombehu ñepei sundao rerecuar upe:

—Yepe che judío, che rumo romano avei aico. ¿Iyacatu pñha peinupara romano chupe mbahe rese poranduēhiseve? —ehi mborerecuar upe.

²⁶ Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

²⁷ Evocoyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rerecuar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecuar upe.

²⁹ Ahese oinupa pota vahe osiquiyepave oyepepi yuvireco ichui; sundao rerecuar guasu avei oicuaase Pablo romano secosa rese, osiquiye ñapichi ucasse.

Pablo oyopei judío porandusa ivate catu vahe-save

³⁰ Ahere ayihive sundao rerecuar guasu oicua tupri pota: ¿Mbahe sui pñha judío oyamotarēhi Pablo yuvireco? Evocoyase oyora. Ahese oyocuai

porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque areco yepi che pihañemoñeta tupri sa pipe —ehi.

² Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi. ³ Ahese Pablo omboyevi chupe:

—¡Tũpa nde nupara, nde aviye tupri tẽi angahu vahe ereico! Nde mbahe rese porandu ãgua cheu porocuita rupi ereĩ. Evocoyase, ¿mahera ereporocuai che yurupete ãgua mborocuita mboyeroyaẽhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pãhuve amove oime saduceo, amove fariseo. Ahese oñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi

vaherã curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehepoepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tũpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sãse guasu yuvireco. Ahese oime amove opũha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tẽi. Aviyeteramo espíritu que Tũpa rembiguai revo oyemboyecua mbahe mombehu ãgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rereciar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pãhu sui, pemoingue iri cuartel pipe” ehi.

¹¹ Ahe pĩtu pipe, yande Yar oyemboyecua chupe aipo ehi: “Eyemonguerẽhi catu, Pablo, inungar che mombehu nde siquiyeẽhisa pipe cohava Jerusalén ve, ãgüe ere aveira che mombehu Roma ve” ehi.

Omboguai Pablo yuca ãgua yuvireco

¹² Ahere ayihive setá judío oñemonuha, omboguai Pablo yuca ãgua yuvireco: “Tũpa rovaque ndayayucaise Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco. ¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahi rereciar upe, tecua pendar rereciar upe avei aipo ehi:

—Oromboguai Tūpa rovaque Pablo; ndorocarui chira ndoroyuaise —ehi yuvireco chupe —. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoiyase mborerecuar viraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eromombehu pota cheu? —ehi.

²⁰ Evocoiyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro vaheṛã yuvireco sese. Omboguai eté

yuca ãgua yuvireco. Ndocarui, ndoihui chira aipo ndoyucaise yuvireco. Cũritei oyemoingatu, osãro viteño nde porocuita yuvireco —ehi mbia chĩhivahe chupe.

²² Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaheřã opi rese, ambuae setenta sundao cavayu harive iyavei doscientos tupri toguata lanza re-sendar yuvireco. Ipare pesopara pĩtuse las nueve pipe” ehi. ²⁴ “Pemoingatu uca avei cavayu Pablo yeupi ãgua. Ēgũe peye pesãro tupriřa seraso yande rerecuar Félix upe” ehi. ²⁵ Evocoyase sundao rerecuar guasu oicuachĩa Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca ãgua viña. Che rumo aicua romano seco rese, ahese araso sundao sepi ãgua judío eta sui ²⁸ ‘¿mbahe rese pĩha ndoyambotai yuvireco?’ viya. Sese araso judío porandusa ivate catu vahe pendar upe iñemonuhasave yuvireco. ²⁹ Ahese aicua yamotarẽhisa judío porocuita sui tẽi iyavei ndoyapoi mbahe tẽi oreu. Sese ndiyai yuca ãgua oreu, soquenda ãgua avei. ³⁰ Ayanduse rumo judío oquẽtiro sese yuvireco, amondo voi evocoi mbia

nde. Ipare amombehu yamotarēhisar upe: ‘Pe-
porandu potase Pablo recocuer rese, pesora Félix
rovai’ ahe chupe yuvireco. Aipo rupive” ehi.

³¹ Evocoyase ahe pĩtu pipe sundao viroguata
Pablo ocuaita rupi yuvireco, viraso Antípatris
ve yuvireco. ³² Ahere ayihive sundao yuviraso
vahe opi rese oyeví yugüeru cuartelve. Sun-
dao cavayu ari pendar güeraño rumo yuvirasoño
vite. ³³ Viroyepotase Cesarea ve, omondo cuachiar
mborerecuar guasu upe yuvireco. Aheseve avei
Pablo omondo yuvireco chupe. ³⁴ Oyeroguĩ pare
mborerecuar cuachiar rese, oporandu Pablo upe:
“¿Que pendar vo nde ereico?” ehi. “Che Cilicia
cotindar aico” ehi.

³⁵ —Oyepotase nde amotarēhisar yuvireco,
asendura nde yoepisa —ehi Félix chupe.

Evocoyase oyocuai opĩtiviisar Pablo rãro ãgua
güetave Herodes rembiapogüer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar
ivate catu vahe, tecua pipendar rerecuar avei
yugüeru Cesarea ve. Ou avei mbia ava mbahe
aposar pĩtiviisar oñehe vaheã Pablo amotarēhi
uca ãgua, ahe serer Tértulo. Ahe yugüeru Pablo
recocuer mombehu ãgua mborerecuar Félix upe.

² Evocoyase Félix güeru uca Pablo. Ahese Tértulo
omboipi sese oñehe aipo ehi Félix upe:

—Nde imboyeroyapri ereico. Aviye ndeu nde
porocuai tuprisa rese. Esepia, ndipoi vavasa
ore recua rupi. Ereyapo uca avei ore recua

pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—. ⁷ Evocoi sundao rerecuar guasu Lisias rumo oyepota ore pāhuve. Ahe opīratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ěgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetesa pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua. ¹² Co judío oicua yuvireco nañhengatai ava upe tūparo guasu pipe, namboavvu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatu eté mbahe che rembiavi mombehu seroya tupri āgua yuvireco ndeu. ¹⁴ Co rumo amombehu vahe ndeu: che amboetei Tūpa, ore ramoi rembieroya

Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—. ¹⁵ Inungar co mbiã, ãgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye. ¹⁶ Sese ayemoviracua tupri che pihañemoñetasa rereco tupri catu ãgua yepi Tūpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo ãgua. Ahese avei mbahe mimba ayuca uca Tūpa upe seropovēhe ãgua. ¹⁸⁻¹⁹ Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehi che rupi, namboavü guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña. ²⁰ Anise, aviyeteramo co oyepota vahe cohave yugüeru, omombehura ndeu que mbahe che rembiavi yuvireco pahirecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe pñratase ipāhuve: ‘Che aroya ava ocuerayevira coiye. Sese che reraso pe rovai co pipe che recoãha ãgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo

—ehi Félix ava upe.

²³ Evocoiyase oyocuai sundao rerecuar Pablo rãro ãgua: “Eremondomira rumo que mbahe semimbotar apo ãgua chupe iyavei imboripar yugüeruse, tihãnecoño yuvireco sese. Ëgüe ere sãro” ehi Félix sãrosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco. ²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tũpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecese ari nde ñehe rendu iri ãgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osẽ ãgua’ oya viña. Sese osãro pucu tẽi. Iyavei setá oyupagüer güeru uca oyeupe oñemoñeta ãgua sese. ²⁷ Ñuvirío araviter pare rumo, Porcio Festo oiique Félix recuñara. Ahese Félix judío mboviha ãgua, oseyá Pablo soquendasave.

25

Festo rovai Pablo imondosa

¹ Mbosapi ari oyepotare Festo osẽ Cesarea sui, oso Jerusalén ve. ² Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohawe oreu” ehi yuvireco ‘yayuca perĩ rupive’ oyapave yuvireco

viña. ⁴ Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayeví p̄iaivira vicho aheve” ehi.

⁵ —Sese pemondo pe rerecuar che rupi. Naporaise co mb̄ia rembiapo, aheve tomombehu yuv̄ireco cheu sembiapocuerai sereco mara ãgua —ehi Festo chupe.

⁶ Evocoyase Festo op̄ita Jerusalén ve ocho ari rupi revo, anise diez ari. Ipare oyev̄i oso Cesarea ve. Ahere ayihive oguap̄i güendave ava reco moingatu ãgua oĩ. Ahese oyocuai Pablo reru ãgua. ⁷ Oyepotase Pablo oso, ahese judío yugüeru vahe Festo rupi, oyemboya yuv̄ireco sese. Ahese omombehu-mbehu t̄ei Festo upe Pablo rembiapo yuv̄ireco, ndoicatui eté rumo seroya uca ãgua yuv̄ireco. ⁸ Esepia, Pablo aipo ehi oyoep̄isave:

—Ndayemboangaipai judío porocuita rese, judío t̄üparo rese, yande rerecuar guasu Roma pendar Cesar rese avei —ehi.

⁹ Festo rumo ombov̄iha pota judío, sese oporandu Pablo upe:

—¿Ndequer̄ehi vo Jerusalén ve ereso vaherã? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyev̄i chupe:

—Cũritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe t̄ei ayapo judío amotar̄ehisave —ehi—. ¹¹ Ayapose que mbahe naporai vahe, av̄iyeȳño che yuca uca ãgua eve; ndayapoise rumo co judío omombehu vahe yuv̄ireco ndeu, ndiyai che mondo ãgua evocoi ava

poŕiŕe eŕe. Che rumo aŕo pota mborerecuar Cesar iŕate catu ŕahe upe cheu mbahe reŕe porandu ãgua —ehi.

¹² Ahese Feŕto oñemoñeta opĩtiŕiŕar oporomboaracua ŕahe reŕe, ipare omombehu Pablo upe: —Ereŕo pota Cesar upe. Aŕiŕe, eresora eŕoŕoŕe —ehi chuŕe.

Pablo mborerecuar Agripa roŕai

¹³ Eŕoŕoŕe moŕiŕo aŕi pare, eŕoŕoŕe mborerecuar guasu Agripa, cuña Berenice reŕe, oyepota Cesarea ŕe “aŕiŕe” apo ãgua Feŕto upe yuŕiŕeŕo.

¹⁴ Opĩtase yuŕiŕeŕo ŕetá aŕi Cesarea ŕe, Feŕto omombehu Agripa upe Pablo reŕoŕe. Aipo ehi chuŕe:

—Oime ñepei mbia ŕoŕuendapri oŕeya ŕahe Félix cheu —ehi—. ¹⁵ Aŕoŕe Jeruŕalén ŕe, juđío paŕi reŕeŕeŕeŕe, teŕua pendar reŕeŕeŕeŕe aŕe omombehu yuŕiŕeŕo cheu ŕeŕoŕeŕeŕe, ‘Tayucasa, tehi chuŕe’ oya yuŕiŕeŕo ŕiña —ehi—. ¹⁶ Ahese aipo ahe yuŕiŕeŕo chuŕe: “Ndiyai eté romano mborerecuar omondo ŕaheŕã que aŕa uŕe ŕeŕe oñemoñeta ŕahe reŕe mbahe moingatuẽhi reŕonŕeŕe. Toyoepi rane omombehuŕar roŕai, tomombehu tupri rane opacatu güeŕoŕeŕe” ahe juđío upe —ehi—. ¹⁷ ŕeŕe yuŕiŕeŕeŕe coŕaŕe yuŕiŕeŕo, aŕoŕandu ŕoŕi pota ŕeŕoŕeŕeŕe reŕe chuŕe. Eŕoŕoŕeŕe ñepei aŕi pare aguapi che reŕeŕeŕeŕe poŕandusave. Ahese ayocuai che pĩtiŕiŕar eŕoŕoŕe mbia reru ãgua —ehi—. ¹⁸ Eŕoŕoŕeŕe opũha ŕeŕe oñemoñeta ŕahe ŕembiapo ai mombehu ãgua. Aŕendu reŕonŕeŕe che piñañemoñeta: “Oyapo reŕo mbahe naŕoŕai ŕahe” ahe ŕiña. Ndipoi eté

rumo mbahe sembiapo —ehi—. ¹⁹ Mbahe sem-bieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. ²⁰ “¿Mara ahera pīha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—. ²¹ Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

²² Evocoiyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ěgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opitivisar Pablo reru āgua yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohava Cesarea ve. Osapucái pīrata tēi yuvireco ‘¡tomano ité evocoi!’ oya yuvireco cheu —ehi—. ²⁵ Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe.

²⁶ Ndarecoi rumo mbahe naporai vahe aicuachía

vaherã imondo ãgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirã sesendar Cesar upe nara —ehi—. ²⁷ Chepihañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe ãgua aipo ehi:

² “Ore rerecuar Agripa, ayopira che rorivetesave judío che rese ñemoñeta-ñeta tẽisa sui mbahe che rembiapoẽhi rese nde rovai. ³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteẽhisendar

⁴ “Opacatu judío che cua vahe yuvireco, oicua tupri che recocuer che chĩhivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. ⁶ Sese cūrítei che reru nde rovai yuvireco che recocuer rese nde porandu ãgua. Esepia, aroya Tũpa remimombehugüer ore ramoi uve omombehu vahe aracahe” ehi. ⁷ “Doce ore ramoi

suindar opacatu judío yuvirecoi, osãro vite evocoi Tũpa remimombehugũer aviye vahe yuvireco. Sese yuviroique tũparove ari, pĩtu pipe avei Tũpa mboetei ãgua yuvireco. Ore rerecuar Agripa, eyapisaca tupri che ñehe rese. Evocoi Tũpa remimombehugũer reroyasa sui judío eta semira-mira tẽi che amotarẽhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tũpa porombogũerayevisa?” ehi.

Pablo omombehu yipindar Jesús reroyasar amotarẽhi agũer

⁹ “Yipindar che avei che pihañemoñeta rai aracaco mbahe tẽi apo ãgua rese ava Jesús, Nazaret pendar, rer amotarẽhisave. ¹⁰ Ëgũe ahe Jerusalén ve. Ombouse pahi rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. ¹¹ “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tẽi. Ëgũe ahe aguata opacatu tũparo rupi, ambuae tecua rupi avei yamotarẽhisa pipe” ehi.

Pablo omombehu güeco recuñaro agũer

¹² “Evocoiyase aso avei Damasco ve Jesús reroyasar mombaraisu ãgua, pahi rerecuar ombouse oporocuita apo ãgua cheu” ehi. ¹³ “Mbiter ari rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei. ¹⁴ Orovipapase ivive, asendu ñehesa aipo ehi vahe hebreo ñehe pipe

cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu. ¹⁵ Evocoiyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarēhi eve. ¹⁶ Epūha, co rese ayemboye-cua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaheerā chupe curi, viya ndeu’ ehi. ¹⁷ ‘Oropīsiora judío sui iyavei oromondora ava ndahei vahe judío upe. Ereguatase ipāhuve, oropīsiro aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipīpe sui toyuvireco iri eme carugar povrive yuvireco; toguata catu Tūpa rupi; ēgūe tehi che reroya yuvireco. Ahese oipīsira ñeroisa oangaipa rese yuvireco iyavei oipīsira Tūpa porerecosā oime vaheerā opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoiyase, che rereciar Agripa, che quer nungarve asepia vahe iva pendar, aroya ité. ²⁰ Aipo ahe ava upe: ‘Pemboasi pe angaipa; peyevi Tūpa upe. Peicove tupri, ipīpe sui to-icua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. ²¹ Sese tēi judío che pīsī tūparo pīpe che yuca pota yuvireco” ehi. ²² “Tūpa che pītiviisa pīpe rumo aicoveño

ité supí, amombehu-mbehu vîte Tũpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tũpa ñehe mombehusar iyavei Moisés, ‘Oimera mbahe aviye vahe’ ihe agüer sui. ²³ Aracahe omombehu yuvireco: “Tũpa Rembiporavo Poropĩsĩrosar omano ranera’ ehi. Ahe rumo yipĩndar ocuerayevi vaherã omano vahe pãhu sui. Omombehu aveira tesapesa ñepisĩrosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supí eté vahe, ndahei che aracuaēhisave —ehi Festo upe—.

²⁶ Co mborerecuar revo oicua tupri avei che remimombehu. Sese ndasiquiyei opacatu co mbahe mombehu ãgua chupe. Esepia, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoi Tũpa ñehe mombehusar rembicuachía? Che aicua ereroya ité —ehi Agripa upe.

²⁸ Ahese Agripa omboyevi chupe:

—Moviro tēi ñehesa ipane cheu Jesús reroya ãgua —ehi chupe.

²⁹ Ahe omboyevi Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ěgüe ehi tarahu Tūpa pēu viña che nungar pe reco āgua. Ndahei chira rumo soquendapirā peico — ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. ³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña — ehi yuvireco oyeupe.

³² Ahese Agripa aipo ehi:

—Ahe ndoporanduisse Cesar upe oso āgua rese, yamoseño itera niha viña — ehi Festo upe.

27

Pablo imondosa Roma ve

¹ Evocoyase mborerecuar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapiri yuvireco mbia Julio serer vahe upe. Ahe mbia sundao rehi rerecuar seci, ahe yuvirecoi vahe rer Mborerecuar upendar.

² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe se-cua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe. ⁴ Sidón sui orosirise, oroso Chipre ivi rupi ivitu sui ore ñemoha āgua. Oroso

pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui. ⁵ Evocoiyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaheṛã Italia ve. Evocoiyase ahe ipipe opa voi ore mboha. ⁷ Ichui oroguata mbegüe setá ari. Oroporaviquí iteanga oreypota āgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. ⁸ Supi yavai rai ore guata āgua, ipare oroyepota yemboyasa Yemboyasa Aviye vahe serer vahe-save. Ahe ichui namombrii tecua Lasea.

⁹ Ore yepota āgua aheve, setá ari oromocañi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite āgua. Yaguata vitesse, yamocañira carite, ivosita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroguatasar, carite yar avei. ¹² Ahe yemboyasa naporai ivitu ai rãro āgua aheve. Sese setá catu “yasoño” ehi vahe yuvienco, “Tayayepota catu Fenice ve, aheve tayasãro ivitu ai” ehi yuvienco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivii rupi.

¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui.

¹⁵ Oyepotase oreu, ndoroicatu iri eté sovaichi. Evocoyase, “Tayande rerasoño” orohe chupe.

¹⁶ Oroñocua caha pāhumi serer Cauda. Ahe oroñocuasave oroviroha sāi ore caritemi ore carite guasu pipe. ¹⁷ Orosupire, ahe oicuhacua carite

guasu inicha pipe yuvireco. Ipare ipihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguataño. ¹⁸ Ivitu

rumo ombohitú iteanga para guasu. Sese ahere ayihive oporaviqui vahe omboipi carite vosiita mombo yuvireco. ¹⁹ Imombosapisa ari pipe,

omombo vite mbahe carite resendar yuvireco.

²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbía, ehi acoi che reroya voira peye viña, nayasēise Creta sui, ahese ndipoi chira co mbahe yandeu cūritei viña —ehi—. ²² Cūritei, peyemonguerēhi catuño. Esepia, ndipoi chira yande

pāhu pendar omano vahe, carite güeraño rumo ocañi tēira. ²³ Ayihi pisa oyemoporēhi cheu Tūpa rembiguai semimbou, chupendar che aico, chupe

avei aporaviqui. ²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tūpa oipĩsiro aveira opacatu nde rupindar carite pipendar” ehi cheu. ²⁵ Mbia, ayeroya Tūpa rese. Esepia, ahe omboaviye itera oñhesa cheu. Sese peyemonguerẽhiño —ehi—. ²⁶ Yande mohañira rumo imbehi coti caha pãhumi rese yande mondo —ehi.

²⁷ Ñuvirío semana ivitu ore reroguata pare ahe pĩtu mbiter pipe para guasu Adriático rupi orocose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. ²⁸ Sese osãha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osãha iri, tipigüer veintisiete metros tẽi. Ahese oicua, “Yarovi ivi” ehi yuvireco. ²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tẽi. ³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tẽi ambuae carite pipendar yuvireco viña, “Oromombora carite renonendar imombitasa” ehi tupri tẽi yuvireco. ³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sã oiti ive imondo yuvireco.

³³ Cõhe ramosẽ Pablo aipo ehi opacatu upe:

—Cũritei ñuvirío semana pemomba pecaruẽhi peico ‘¿mara yahera pĩha co yaico?’ pe hesa pipe. ³⁴ Evocoyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepepe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tũpa upe ihu ãgua. Ahe imbohi pare, ohu. ³⁶ Evocoyase opacatu ava oyemonguerẽhi yuvireco ocaru ãgua. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosita para guasu pipe iposiehi ãgua yuvireco.

Carite ocañi

³⁹ Cõhese, osepiase ivi, “¿Que pĩha yaico?” ehi tẽi yuvireco. Oyosuse rumo yãcua vahe, ipipe oime ivi cuhi ipiru vahe. Aheve yuviroique pota tẽi yuvireco viña. ⁴⁰ Oyasia ahe carite mombitasa cuasa carite sui yuvireco, omonguhi carite mboyahvasa, osupi carite resendar turucuar imboguatasa yuvireco. Evocoyase oroique oroso yãcua vahe pipe. ⁴¹ Oroguatase rumo, oroyapi ivi cuhi. Aheve carite opãha ité sese. Ndoicatu eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiẽtera, oñemi yuvireco. Sese yayucapa” ehi yuvireco chupe viña. ⁴³ Sundao rereciar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. ⁴⁴ “Ambuae evocoyase ivirape,

carite yecacuer rese toyasecoño yuvinose ãgua ivi rese” ehi. Ëgüe orohe orosẽpa ivi rese oroso.

28

Caha pãhu Malta ve Pablo secoi

¹ Ore ñepisiropare, ahese ramo oroicua caha pãhu rer Malta revo rahe. ² Ahe pendar ava nihapisi ore repiase yuviceco. Oquí iteanga, sõhisa avei. Ahese oyatapi guasu yuviceco, “Perio, tapeyepehemi” ehi yuviceco oreu. ³ Evocoyase Pablo omonuha yepeha seru, omondo potase rumo tatave, ahese osẽ aviyeteramo tẽi sacucuer sui mboi ahe eté vahe chupe, oipomama ichuhu. ⁴ Osepiase mboi ichuhuse ahe pendar yuviceco, ahese, “Co mbia revo oporapichi vahe ité. Yepe oñepihiro para guasu sui viña, Tũpa rumo oichuhu uca mboi upe ‘tomanó’ oya” ehi yuviceco viña.

⁵ Ahe rumo omomboño mboi tatave imondo oyesui. Ipare nomomaraño ité. ⁶ Ahe pendar opacatu osãro tẽi yuviceco, “Irirura chupe, ahese oviapira, omanora revo” ehi yuviceco chupe viña. Osãro pucu tẽi yuviceco, Pablo rumo nimaraño ité. Ahese, “Ndahei vo co mbia tũpa ité co secói” ehi tẽi yuviceco chupe.

⁷ Evocoyase mbia Publio serer vahe, ahe opacatu caha pãhu Malta pendar ava rereciar secói. Ivi namombriimi ichui. Ahe nihapisi ore repia güetave iyavei ihañeco tupri ai ore rese mbosapi ari rupi. ⁸ Aheve ore recoseve Publio yesupa sohí iteanga ou, sepochiuvi avei. Evocoyase Pablo oi que chupe. Ahese oyeroku Tũpa upe sese, omondo opo iharive. Ëgüe ehi

imbogüera. ⁹ Oyanduse ahe icuera yuvireco, ahes ambuae imbaheasi vahe evocoi caha pâhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha âgua ambuae carite pipe, opacatu mbahe ore guatasa rupi ipaneêhi âgua ogüeru yuvireco oreu.

Pablo oyepota Roma ve

¹¹ Co carite mbosapi yasi osãro vahe ari mbahe tēi vahe pituhu âgua. Ipipe oroso. Ahe carite yugüeru Alejandria sui. Ahe ichi rese ñuvirio itüpa rahanga yuvireco: ñepe rer Cástor, ambuae evocoyase Pólux. ¹² Ahes oroso oroyepota yemboyasa Siracusa ve. Aheve oropita mbosapi ari. ¹³ Ichui orosē oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güetave yuvireco ñepe semana. Ipare oroso Roma ve ivi rupi. ¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda âgua yuvireco. Sepiase, Pablo, “Aviye ndeu” ehi Tüpa upe. ¹⁶ Oroyepotase Roma ve, sundao rereciar co coti omondo Pablo ñepe sundao upe sãro uca âgua.

Pablo omombehu Roma ve Tüpa Ñehengagüer

¹⁷ Mbosapi ari pare Pablo omonuha opacatu judío rereciar Roma pendar. Ahes oñehe chupe:
—Che mu eta, ndayapoi mbahe tēi judío Jerusalén pendar upe, narioi avei yande ramoi recocuer viña. Che roquendasa rumo iyavei

imondopri aico Romano sundao rerecuar povri. ¹⁸ Ahe mborerecuar oporandu che recocuer rese yuvireco. Oicuase che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca āgua yuvireco. ¹⁹ Evocoi judío rumo ndoipotaiño ité chupe. Ahese ayu pota cohave Cesar upe che yoepi āgua. Nayamotarēhi uca potai rumo che mu Jerusalén pendar Cesar upe —ehi—. ²⁰ Che yoepi āgua oposoho uca. Opomoñeta pota yande remiaro rese. Co Tūpa Rembiporavo ava pĩsĩro āgua resendar reroyasa rese carena pipe ñapichimbri aico —ehi.

²¹ Ahese ahe ava omboyevi yuvireco chupe:

—Ndroipisi eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroĩro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari iñehe āgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tūpa mborerecuasa resendar iyavei Jesús recocuer Moisés porocuita icuachiapri pipe sui iyavei Tūpa ñehe mombehusar rembicuachía pipe avei ‘toviroya yuvireco’ oyapave. Ēgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco. ²⁵ Opihañemoñetasa nomboyoyaise yuvireco, yuvinosepa pota. Ahese aipo ehi ahe ava upe:

—Supi eté Isaías omombehu Espíritu remimombehu pe recocuer resendar pe ramoi upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tẽira mbahe viña,
ndapesenducuai chira rumo.

Iyavei pesepia tẽira mbahe viña,
ndapemahecuai chira rumo sese’ ere chupe.

²⁷ Esepia, co ava ipiharãtá iteanga seroyaẽhisave.

Ndoyemboapisaiño yuvireco.

Iyavei osapĩvii tupriño mbahe sui, ndosepia potai
mbahe aviye vahe yuvireco.

Ndosenducua catui eté avei ñehesa supi eté vahe.
Evocoyase ndoyevi potai cheu güecocuer moin-
gatu yuvireco” ehi Espíritu Santo

remimombehu chupe aracahe —ehi—. ²⁸ Sese
tapeicua co pipe suive Tũpa omboyecua ucara
oporopĩsirosa ava ndahei vahe judío upe. Ahe
niha oyapisacara imombehusa rese yuvireco —
ehi chupe.

²⁹ Aipo ihe pare, judío yuvinose iñehe rese oy-
eecopi-copi yuvirasó.

³⁰ Ipare Pablo opita ambuae ava rẽtave ñuvirío
araviter rupi omboepi oque água oico. Aheve
nihapĩsii opacatu ava rese oyepĩri oyepotase
yepi. ³¹ Omombehu Tũpa mborerecuasa resendar
iyavei oporombohe opacatu yande Yar Jesucristo
recocuer resendar osiquiyeẽhisa pipe. Ndipoi eté
que ava omombituhu vahe Pablo ñehese.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

c27c2d97-c359-59f5-b367-83efb2e33739